

**Bëgalasi
Bëhefes
Bëfilip
Bëkolos
Filemon**

Les épîtres de Paul aux Galates, aux Ephésiens, aux
Philippiens, aux Colossiens, et à Philémon

ATB
25, rue de l'Isle
26000 Valence
France

Les épîtres de Paul aux Galates, aux Ephésiens, aux
Philippiens, aux Colossiens, et à Philémon

En langue oniyán

Guinée et Sénégal
Afrique de l'Ouest

Première Edition

2013

Illustration

Louise Bass ©The British and Foreign Bible Society, 1994

Kayëta ir

Bëgalasi Bën

Ecëmar

1 Wëno Pol, këñun ÿëgwënëlınd. Faba Kaxanu sana ke me gi batula paß gë Yesu Kërisët ir xanin këño gër bëshësëk : ax gena paß gë ala bëte ax gena ga sana këne bela. ² Wëno gë bëmaÿe bënd hi këmi ro bëñ këñun ÿëgwënëlınd wën do dek bëmaÿe bënd gër bamara band Yesu band gër ebar ed Galasi bën. ³ Kaxanu Faba irebi do gë Yesu Kërisët, axwën arebi an, yëlëlenun oyekax ol gë aketëxeta añ. ⁴ Axwën an Yesu Kërisët wãk şës ko në end bamena bandebi ebo dacëtaxën gër anıyan atëmbak and gë okey oko año, ang ÿandi këño Kaxanu Faba irebi ak, ⁵ gër mëñ ar hik gë enjaran din ir din an ! Amen !

Oxalay kalay or Bëgalat ol

⁶ Mbañ şaran ke wëno ang şeß këno Kaxanu xarak mëñ sana këñun paß gë oyekax or Yesu Kërisët ol do kën sëfënd atëfëtan acëxe aÿand ako. ⁷ Enimin, atëfëtan acëxe ax gena. Barikan bela exëna bër këñun felëtënd ga ÿandi këbi eni nëngwët atëfëtan and Yesu Kërisët añ. ⁸ Ado ex gido ar enga endam, ba meleka ir xaniwëk gër orën eñun pelënd atëfëtan and fitarëk gë and sëfëtan këmun wëno añ, kataleño !

⁹ Ang felëra bamun biyi gër ÿanar ak këmum xënënanand wëno gërëgako : Angëmëne ala eñun pelënd atëfëtan and fitarëk gë and nangën këmum biyi añ, kataleño !

¹⁰ Do gërëgako ene cëkw bela bën nde këme şaland ? ba exe cëkw Kaxanu nde ? Ba këme şaland ene ñan bela nde ca ? kido ene ñan bela bën ÿandi baxe, ame gi dona xadëp ir Yesu Kërisët.

End Pol eñ

¹¹ Ga re këme bëmaÿe, Atëfëtan and nangën këmum año ax gena endey end bela. ¹² Yesu Kërisët mëñ dëñ nangën ke, ax gena ala sëfëtan ke, bëte ax gena ala sëyali ke. ¹³ Ax gena nde awël wël kën er bame rind and bayi bame gër cale ind biyi Bëşëwif añ ? Wëno babi rixërand wa gë oÿeÿ osëm bërëwãk end Yesu Kërisët bën, bër Amara and Kaxanu bën, xali bamëni şaland mëni daw bën dek. ¹⁴ And bayi bame gër cale indebi añ, wëno nëmëca babi Bëşëwif bënd anjex gë wëno bëñ gër epëb ed bapela band banëbo sëyalind bëxarëk bërebi bañ. ¹⁵ Barikan yatir fed këmi gë ar fit ke elod gër acël and nëma an, wac ke gë oyekax orexëm ol. ¹⁶ Nangën ke Asëñiã arexëm an mëni tëfëtanaxënënd endexëm eñ bër benëng becëxe bën. Ata wëno ame yex na mo mëkara ala. ¹⁷ Bëte ame yex na gër obatula oñanar yañ gër Yerusalem. Barikan ye këme şëw gër ebar ed Arabi bakaxanëgu këme gër Damas. ¹⁸ And sëkëk bëniÿ bëtas añ, baka këme

yaŋ gër Yerusalem mi nangër gë Sefas. Ata ri këmi bakey epëxw gë banjo gër ndebën. ¹⁹ Bari batula gibatak ami watër bana, angëmëne ax gena Şak abinëm ar Axwën Yesu. ²⁰ End këmün felënd ejo, Kaxanu anang nang ko mëne dal ex, ame nëgwëşënd na.

²¹ Ga xucak ejo, ye këme bëte gër owar or Siri do gë Silisi. ²² Xarak ala axe nang bana amëd aŋo gër bamara band bërëwãk end Yesu Kërisët gër ebar ed Yude na. ²³ Awël fo bani wëlënd endam eŋ mëne ar babi rixërand an anëka nëngwëta ko ; gërëgako, mëŋ këbi nangënënd bela bën end eno kwëta Yesu Kërisët eŋ xarak ejo yãndi baŋo exo daw. ²⁴ Do në end ecarax end ri ko gër ola oram ejo bano şëkwaxënënd mbaŋ Kaxanu.

End Pol do gë obatula ocandaw eŋ

2 Ata ga sëkëk bëniy epëxw gë bënax, baka këmi gë Barënbabas yaŋ gër Yerusalem, wëlali këmo bëte Tit. ² Er bakaxën bame gër Yerusalem in, Kaxanu wãsin baxe. And hat këmi aŋ, nacëta këmi gë bëlëngw bër gër Amara bën do nangën këmëni Atëfëtan and këme femënd gër bër ax gena Bëşëwif aŋ. Mondako wëlër bame këdi këme soro asoro fo gër andiyen and ri këme do bayik këme rind aŋ. ³ Ado Tit dëŋ, ar ax gena Aşëwif ar wëlali bamo an ala aŋo nëyali bana eno kac. ⁴ Barikan bela hi bax na bër bax rënd

okëreceŋ exëni xarak enëgwës këni rind. Er yow bani akey amat yir fo enëbo bakali gër oxadëp ga yãndi babi enëbo bël gër oyekax or šot këmi gër Yesu ga wã këmi endexëm eŋ. ⁵ Bari ado gë təkër ak amëni baxëte na mënŋ kē bayexën Atëfëtan an nëgwëtërexe gër oŵëkw orewën.

⁶ End bër hik belëngw bër gapak gër Amara eŋ cëŋ, er hi bani akarëk in wëno axe bale na : Kaxanu mënŋ abi pitëndërënd na bela bën ! Bër gapak bëjo yowëyë ane nëyali ex na. ⁷ Barikan wat këni mëne wëno sana ke Kaxanu mëni nangënend Atëfëtan aŋ bër ax gena Bëšëwif bën ang sana këŋo Piyer ebi nangënend Bëšëwif ak. ⁸ Kaxanu laŵën këŋo Piyer gër Bëšëwif do wëno gër bër ax gena Bëšëwif. ⁹ Ata Šak, gë Piyer do gë Šaŋ bëlëngw bër gapak bër fëb banëbi mbaŋ bën yëlër këmi bataxan baŋ ex macayaxën mëne alëkër lëkër këmi gër andiyen : biyi mi yend gër bër ax gena Bëšëwif do bën gër Bëšëwif. ¹⁰ Er xara banëbo fo mëni kwitand axwita bëxaÿënaŋik bën do eŋo gë obal osëm bame rind.

Akucara and Pol gë Piyer aŋ

¹¹ Barikan and yow ko Piyer gër Aŋëcoš aŋ, fabër këmi do nëp këmo gayik aŵen wën baxo. ¹² Damana eni yow Bëšëwif bër laŵënu babi Šak bën, bër bax balëkënalind end oxac bën, Piyer, andamat bani yambërand gë bër ax gena Bëšëwif bën. Barikan

ga babi yëdand, and ĥatu këni aŋ nacëta këbi bër ax gena Bëšëwif bën. ¹³ Ata Bëšëwif bëšëxe bër wã bax end Yesu bën sëfëteli këno bëte Piyer gër amena andexëm xali lënan këno Barë nabas dëŋ gër eŋo. ¹⁴ And wat këme mëne ani dind na šenene aŋ, ang kë sëyalind Atëfëtan ak, rexëra këmo poyoma Piyer mondako : “Wëj ašëwif hi këy, barikan këy wurend ang bën bër ax gena Bëšëwif ak, ay masinaÿad na ang ašëwif fo. Do mondake cëŋ këy xor eyëbi nëÿalind bër ax gena Bëšëwif bën eni wurend ang Bëšëwif ak ?”

Apexa and benëng dek aŋ

¹⁵ Biyi, Bëšëwif rëw kënebo, ane gixe na bela bër benëng becëxe, ane gixe na bëwendëran. ¹⁶ Anang nang këne mëne ala ar xwëta këŋo Yesu Kërisët an hik ar šenene an, bari ax gena gayik asëf sëf ko er rek acariya and Moyis in. Biyi bëte aŋa wã këne end Yesu Kërisët eŋ ene gixëne bër šenene paß gë ekwëta ed xwëta këneŋone el, ax gena gayik asëf sëf këne er rek acariya and Moyis in. Ala ax gind na ar šenene ga xemëna ko etëf ed acariya el. ¹⁷ Angëmëne ene calande paß gë Yesu Kërisët ene giye bër šenene, do wã këne mëne biyi bëte bëwendëran hi këne, Yesu Kërisët nde këbo lënanënd eñëŋënaŋ eŋ ? Adokiŋ ! ¹⁸ Angëmëne me bakan ecëŋëxët me dind bënd gër acariya bënd seß këme beŋ, wëno dëŋ kë nëpaÿand. ¹⁹ Enimin ang

ÿandi baño acariya ak, şës këme në and nemi ko Yesu aņ. Gërëgako aniyandam aņ aňan ĥan ko Kaxanu, ame bayex na ga wëña ke acariya aņ. ²⁰ Wëno anëka fika këne gö Yesu Kërisët aniyand këme wurënd aņ, and Yesu Kërisët aņ kë watind gër ola oram. Ga këme wurend, ga xwëta këmo Asëñiŵ ar Kaxanu an ex, mëñ ar ĥan ke do yëlaya ko në endam an. ²¹ Mëñ ex, axe cenax na end oyekax or rin ke Kaxanu eņ. Enimin kido ga sëf këne acariya aņ fo hixën këne bër şenene, awa mama fo şës ko Kërisët.

Acariya aņ gö ekwëta el

3 Wën Bëgalasi ata and aņun pënind na dëñ ex de ! noÿo wa yifa këñun ? Awat wat kën kerët ang fika këno Yesu Kërisët ak paß gö ola oram ol. ² Emat fo ÿandi ke mun mëka ene pel : Ba ga sëf kën acariya aņ nde şotaxën këno Angoc Amënëk aņ ? Ba ga baxët kën do xwëta kën end gër Atëfëtan eņ nde ? ³ Mëñ ex wën ata and aņun pënind na dëñ ex. Angëmëne enimin gö panga ind Angoc Amënëk in ÿana kën, mondake cëñ nëngwët kën, kën wurend gö ojaŵ odewën ok ? ⁴ Do dek er hi kënuñ gër aniyandewën in ahi fo nde hi këñun ? Angëmëne ahi fo hi këñun ax ñape na. ⁵ Ar yël kënu, Angoc Amënëk aņ, ar kë rind becarax mërëxand irewën an, ba ga sëf kën acariya aņ ? Ba ga xwëta kën end gër Atëfëtan eņ nde ? ⁶ Ax gena nde Abëraxam axwëta xwëta baño Kaxanu mëñ hixën

baxo ar êenene gër ogës odexëm ? ⁷ Mën ex nanging mène bër xwëta këno Yesu bën fo hik obaê or Abëraxam ol. ⁸ Oñëgw Omënëk ok fëna bax mène axwët këbi xwët bër êenene ga xwëta xwëta këno Yesu Kërisët. Kaxanu fel baño Abëraxam endey enëngax eño : "Benëng beñ dek kë beta në endey."

⁹ Mondako këni êot oyekax ol dek bër xwëta këno Kaxanu ang Abëraxam ak bën. ¹⁰ Do dek bër kë yëland êenene hi këni gër ogës od Kaxanu bën në end ga këni rind er rek acariya and Moyis in, anëka xata këbi ga këbi nëp Kaxanu. Enimin aÿëgw ÿëgw këni :

« Katalenjo ar ax tef na dek er rek acariya and Moyis in. » ¹¹ Ala ax gind na êenene gër ogës od Kaxanu

gayik acariya sëf ko do eño dal ex. Ga yëgw këni :

« Ar êenene an awure ko wurend gayik axwëta xwëta këno Kaxanu. » ¹² Xarak, etef ed acariya el bañ fitarëk gë ekwëta ed Kaxanu el. Gër Oñëgw Omënëk ok ga rek : Ar kë ða exo dind dek er rek acariya in kë wure gë beño. ¹³ Kërisët nëmbak gayik abane xore na ene tefe er rek acariya añ. Enimin ga ÿëgw këni gër

Oñëgw Omënëk : « Ala ar xapeli këno yo në osëx ar xata këno ex. » ¹⁴ Ga sës ko Kërisët mondako këni

êotaxën bër ax gena Bëêewif bën oyekax or beya baño Kaxanu Abëraxam ol. Biyi dek mondako kënenjo êotaxëne Angoc Amënëk and beya këbo Kaxanu añ gayik axwëta xwëta kënenone Yesu Kërisët.

Acariya aŋ gë ebeya el

¹⁵ Bëmaÿe faxëtin amatinal aŋo : Agëmëne ala exo deÿa ang këni bëtelið acota andexëm aŋ do exo ñëgw. Ax gena nde ala ax nëngwëtënd na bëte ala ax ßašënd na er ÿëgw ko in. ¹⁶ Do mondako beÿa baŋo Kaxanu Abëraxam. Bend beÿa baŋo beŋo, xwën bani Abëraxam do gë ar andëwëra andexëm ex. Oñëgw Omënëk ok ax dex na gë bër andëwëra andexëm bën këdi këni yëla bela bën end bëranjëm ko yeyanënd. Barikan end ala abat fo kë rend Oñëgw Omënëk ok mëŋ exo Yesu Kërisët. ¹⁷ Mëŋ këme rexënënd mëne : er beÿa baŋo Kaxanu Abëraxam in, acariya and ħatuk bëniÿ okeme onax gë ofëxw osas aŋ ax kor na ex yepën. Kido ako bax, end beÿa baŋo Kaxanu eŋ ax gi dona. ¹⁸ Angëmëne er xëñëna baxo Kaxanu ebo yël in gë acariya aŋ këne šotënde, abo yël dona në end ga beÿa ko. Xarak Kaxanu ga beÿa baŋo Abëraxam yëla xën baŋo oyekax orexëm ol.

¹⁹ Do ine wa hixënëk acariya aŋ ? Në end bamena band bela fedalixënu baxo Kaxanu acariya aŋ, xali exo ŋataxënëgu ar andëwëra ar Abëraxam ar beÿa baŋo an. Acariya aŋo omeleka lawëneliw baði Kaxanu gër Moyis do mëŋ šena ko nangën këbi bulunda ir Isërayel in. ²⁰ Barikan and beÿa baŋo Kaxanu Abëraxam gë ar andëwëra andexëm aŋ, aħatelindër ax gi bana, enimin Kaxanu gabat ebaxo.

Ofëcak or acariya ol

²¹ Acariya aŋ wa do, ayepën nde kë yepënënd bend beya këbo Kaxanu beŋ ? Adokiŋ ! Angëmëne acariya and kë yëlënd aniyān hi bax na, or ŝenene ol gër acariya dox xaniwënd. ²² Bari ax gena mondako. Gër Oñëgw Omënëk këne watënde mëne eñëŋënaŋ eŋ wëñak gwën iŋ dek eni cotaxën bela bën er beya ko Kaxanu ayël këbi yël in and këni wā end Yesu Kërisët aŋ fo. ²³ Namana exo ŋataxënu Kërisët Mëŋ ar këñëŋo xwëtaye an, acariya aŋ babo xadacënd gand ndexëm. ²⁴ Acariya aŋ hi bax ang axadac arebi fo xali ebo ĥateli gër Kërisët ene gixëne bër ŝenene ga xwëta këñëŋone. ²⁵ Do ga ĥatu ko ako ar xwëta këñëŋone an, ane bayix na gër otaxan od acariya. ²⁶ Gërëgako wën dek hik obaŝ or Kaxanu ga xwëta këno ako Yesu Kërisët. ²⁷ Wën dek ga buyi kënun ako anëka bar këñ gë Kërisët. Gër ogës od Kaxanu anëka hi këñ ang mëŋ ak. ²⁸ Mëŋ ex gërëgako wën dek ar abat hi këñ ga bar këñ ako gë Yesu Kërisët : Aŝëwif ax gena, ar ax gena aŝëwif ax gena, xadëp ax gena, asoŝan ax gena, asoxari ax gena. ²⁹ Do ga bar këñ ako gë Yesu Kërisët, bër andëwëra and Abëraxam hi këñ, wën ex bër kë bëteli er beya baŋo Kaxanu ayël këŋo yël in.

4 Eŋo këme rend : ang kë nëka yo ga bayi ko itox ar kë bëteli napul ir sëm an ani pitarënd na gë

xanëp in. Xarak oxwën or napul ol dek orexëm
 ex. ² Bela këjo nëkonand gë napul irexëm ak dek, xali
 ex ñat nand fënëta ko sëm exo bëteli na. ³ Ata biyi
 bëte ako fo ex endebi eñ : and bayi bane ang obaş fo
 añ gër mbëña ind bacariya band ex yo. ⁴ Barikan and
 ĥatan këjo Kaxanu añ, lawëneliw këjo Asëñiĩw rëw
 këjo asoxari do sëf ko acariya and Moyis añ, ⁵ ebi
 dacëtaxën bër wëña këbi acariya bën, ene gixëne obaş
 or Kaxanu. ⁶ Do ga hi kën ako obaş orexëm,
 lawënelixënu këbo gër oñëkw orebi Angoc and Aëñiĩw
 añ. Në end Angoc año këjo wacaxënde Kaxanu :
 "Faba !" ⁷ Mondako hixën kën obaş or Kaxanu, an
 bayex na okadëp. Do angëmëne obaş or Kaxanu hi
 kën ayël këjun yël oyekax or fenan këbi obaş orexëm
 ol. End obal od Pol eñ

⁸ Akarëk añ, wën ano nang bana Kaxanu do mën
 banëbi šalend batox bapësëfës, mën ban xëland olaš
 or bani yëland Kaxanu ex oñ xarak enimin anjëlan
 año ax gena ðal. ⁹ Barikan gërëgako ga nang këno ako
 Kaxanu, me dedo mën ga nang këjun ako, mondake
 cëñ kën bakand gër mbëña ind bacariya band ofëcak
 añun mëlanund na baño. ¹⁰ Ax gena nde wën kë
 yëland mëne : bakey exëna, opacañ exëna, bapëxëd
 exëna, bëniy exëna bënd xwucak ex këbën ? ¹¹ Ata
 wëno mbañ këme yëdand ðe endewën eñ, bamat ba
 asorora fo bame sororand në endewën na.

¹² Bëmaÿe, axara këmun xarand nëngwëtayin ang

wëno ak : wëno ame bayex na gër mbëña ind acariya. ¹³ Aye nang kën mëne ame bëngw bana and bame femërand añanar Atëfëtan and Kaxanu aŋ gër ndewën na do gematak dëŋ ane menane na. ¹⁴ Ang sêxwëra bame ak ane cus bana bëte ane kwëÿëta bana. Wëlaya këne ang meleka ir Kaxanu fo, ang Yesu Kërisët mëŋ dëŋ ak. ¹⁵ Do gërëgako feye ÿek onënga orewën ol ? Amëd aŋo dek hi ban onënga ol. Wëno dëŋ aye nang këme mëne axor xor don en dëxët bangës bandewën baŋ do ene yël. ¹⁶ Do gërëgako ar angoÿëra andewën nde hi këme ga këmun felënd ako ðal in ?

¹⁷ Bër kë wësinënd obal paß gë wën bëjo anun ŋane na. Er ÿandi këbi enëbo capëreli wëno gë wën do eŋun balënd endebën fo. ¹⁸ Ebalëkënali ed beÿ el er sênene ex nand ex yo barikan gilex bebëyekax. Do ang baŋun balënd endam ak bayiyin ga këŋun balënd mondako fo. ¹⁹ Wën obaß oram angëmëne me kwitand ang soro këme në endewën na, gaşëxe ke ÿambënënd ang asoxari ar kër ex dëw fo. Do gë ayambën ijo këme bayi xali nand kën wender dek ge Yesu Kërisët na gër ola orewën. ²⁰ Enimin oñandi odam ok ex me gido gërëgako mërëxand irewën, mëŋ nangaxën dome ba mondake felëraxën domun. Ata dek wëlandëra ke ðe endewën eŋ.

End Sara do gë Agar eŋ

²¹ Wën bër ÿandi këŋun en tëf acariya and Moyis

bën, peline ba afëni dëj nde fëni këjun er yëgw ko Moyis in ? ²² Ga yëgw ko wa mëne Abëraxam bëtox bëki şot babi, inanar in gë asoxari ar hi bax xadëp an, ikinëm in gë asoxari ar ax gi bana xadëp an. ²³ Itox ind xadëp in rëw bano ang këno şaland bela bën itox ak. Barikan ind asoxari ar ax gi bana xadëp in şot bano ga beya babi Kaxanu ayël këbi yël. ²⁴ Eno apënëtal ex : « Bësoxari bëxi bëjo ex amatinal and oser oxi aņ. Asoxari ar ebax xadëp an hik eter ed ri baxo Kaxanu gër etënd ed këni wacënd Sinayi el. Asoxari ajo Agar këno wacënd, obaş orexëm ol okadëp exëni. » ²⁵ Ata Agar ex etënd ed Sinayi el gër ebar ed Arabi. Kaxanu fën yëlu këno Moyis acariya aņ ; mëj ex angol and Yerusalem and gërëgako aņ, mëj gë obaş orexëm ol okadëp exëni. ²⁶ Barikan Yerusalem ir yan gër orën in ex asoxari ar ax gena xadëp an. Mëj ex nëma irebi. ²⁷ Mëj yëgwaxën këni :

« Nëngandëralexi wëj asoxari aboroxok an,
 nëngandëralexi wëj ar ax dëwënd na an
 Depërayind, ņerërayind onënga ol wëj ar elod
 ax tÿyex na ayambën an. Gayik wëj ar fela
 këni gër eņer an, obaş orey ol ayëmb këni
 yëmb nëmëc
 Gë or asoxari ar gë bayik gër icën an. »

²⁸ Bëmaÿe ga hi kën obaŝ or Kaxanu mëŋ dëŋ bëya këŋun ang bëya baxo end Isak ak. ²⁹ Do ang hi bax akarëk aŋ, ar rëw këno ang këno ŝaland bëla itox ak baŋo rixërand ind rëw këno gë angoc amënëk iŋ, mondako fo hik bëte gërëgako. ³⁰ Xarak er yëgw këni : « Ŋwãÿëlëbi asoxari ar ex ekadëp an do gë Asëniw, gayik itox indexëm iŋ din ani dëngina andamat gë itox ind asoxari ar ax gena xadëp an. » ³¹ Mëŋ ex bëmaÿe, pënileŋun aye eŋo : « Obaŝ or asoxari ar ax gena xadëp hi këne, ane gexe na obaŝ or asoxari ar ex xadëp an. »

Oyekax or oxëreceŋ ol

5 Ene canaxëne gër oxadëp or acariya, racëtaxën këbo Yesu Kërisët. Awa dëkayayin ŝenene eŋo do këren bëka na gaŝëxe gër oxadëp.

² Wëno Pol ga re këme angëmëne ako kën yëland bër ŝenene hi kën gayik axac xac kënun, er ri ko Yesu Kërisët in yoweÿ aŋun yël na. ³ Ga re këme bëte : ar rek axac këno xac yo, tëfindëlexo de dek er kë rend acariya in, gematak kërexo dífënd na. ⁴ Anëka ŝapër kën gë Yesu Kërisët wën bër yandi këŋun en gi ŝenene gër ogës od Kaxanu gayik asëf sëf kën acariya aŋ, nangin mëne anëka, an gena ŝëf gër bër yël këbi Kaxanu oyekax orexëm bën. ⁵ Biyi cëŋ ga xwëta këmo Yesu Kërisët nangaxën këmi mëne bër ŝenene hi këmi. Në eŋo këmi xemënoxënënd gë panga ind Angoc

Amënëk inj. ⁶ Gër bër barëk gër Yesu Kërisët er xëbënëk in ex ekwëta ed kë wäsinañand gë ebalër el, ax gena oxac ol, ax gena bëte oxacërëx ol.

⁷ Şenene ga ÿana ban oxëreceñ orewën ol, noÿo cëñ yifa këñun xali seb këñ däl in ? ⁸ Endey end yifaxën kënun eñ ax kaniwe na de gër Kaxanu, mëñ ar sana këñun an. ⁹ Ax gena nde lewir ir təkër fo kë fufënënd dek pix ind negali këni inj ? ¹⁰ Wëno axwëta xwëta këmun mëne ang këme yëland ak ata mondako dëñ këñ yëland wën bëte ga bar këne gë Axwën an. Ar këñun yëbun an, hi ko yo ar hi ko an, Kaxanu anëp këño nëp.

¹¹ Bëmaÿe angëmëne ang këme femënd ak afel këmëni felënd bela bën enëbi kac eni gixëne bër şenene, arixëra nde done rixërand ali ? Ga këme femënd mëne Kërisët şësëk gër kërëwa këne xoÿënaxënënd bela bën. ¹² Bër këñun yëbunënd gë endey bëjo kemënal exëni eni kacërënd oyëxwëyët.

Okaxër ond eman gë Angoc Amënëk el

¹³ Bëmaÿe wën cëñ Kaxanu racët këñun gër oxadëp do an bayex na oxadëp. Obetak or şot këñ olo, balërindëreleşun do dëcarindën andewën rewën. Kërex gi na akay and en dind er ex oñandi od eman ok fo. ¹⁴ Dek acariya and Moyis añ në apela amat barëk, and kë rend : « Balindëlexi end aşadax eñ, ang ki balënd end gaf ireyäk ak. » ¹⁵ Barikan angëmëne

wën en ɲatërënd do en yambarënd andewën rewën, titinayin de këdi kën lawër.

¹⁶ Awa ga re këme : wureyindën ang këŋo yândind Angoc Amënëk ak ata kën seb etëf ed oñandi od eman ok. ¹⁷ Gayik wa oñandi od eman ok alandar landarëk gë od Angoc Amënëk ok. Oñandi od Angoc Amënëk ok alandar landarëk gë od eman ok ado mokucar xucarëk xali wën an korënd na en di er këŋun yândi in. ¹⁸ Barikan angëmëne Angoc Amënëk aŋ këŋun xadacënd an bayi na gër okadëp or acariya. ¹⁹ Xarak anang nang këne mëne oñandi od eman ok kë lënanënd : gër orekar, gër ošëxwëpëtaxik, gër eñac, ²⁰ gër olaš, gër ošaki, gër ecusër, gër ekeyër ed gë bela, gër oyakëraxi, gër oxeỹ, gër ebañëreli ed bela, gër ecapëreli ed bela, gër osëmbak, ²¹ gër ahat, gër ošëb, gër ekureli ed eyambëran, do gër bend mondako rako. Enimin, në ekwitan emun ang fel këmun ak : bër kë wurend mondako bën ani dîl na gër owun or Kaxanu.

²² Barikan bër këbi xadacënd Angoc Amënëk bën kë wurend aniyand : gë aŋana, gë onënga, gë obetak, gë ebuŋan, gë edëcar, gë ekwëta, ²³ gë obëngw or onden, gë anjus do acarayi ax cëbane na bendako beŋ. ²⁴ Barikan bër bar këni gë Yesu Kërisët bën, anëka fikali këni gë mëŋ gër kërëwa, eman eŋ do gë oñandi oñëjënax odebën ak. ²⁵ Angëmëne gë Angoc Amënëk

aŋ bar këne, wurende ang këbo xadacënd ak. ²⁶ Kërene dafënarande na, ax gena mondi er ko xoỹ ašandax in, oħateỹi kërex gina.

6 Bëmaỹe, angëmëne eno pënga ala ga ko wendërand, wën bër këŋun xadacënd Angoc Amënëk bën wërëšëtino endëmane fo. Wën bëte titinayin këdi këŋun naŋëta do en mendëra ang mëŋ ak. ² Dëcarindën gër ocëmuk andewën rewën, gayik mondako, kën ãana en tëfënd dek er rek acariya and Kërisët in. ³ Angëmëne ala exo yëland mëne mëŋ ala asëm hi ko xarak ãoweỹ axo gena gaf irexëm fo ko yifand. ⁴ Ala kala dafënayindëlexo gabat në end er ko xorënd exo di in, xarak ax gena exo matinali gë er ašëxen in. ⁵ Gayik wa ala kala gë er ko rind ko yaka gër Kaxanu.

⁶ Ar këno sëyalind eyeyan ed Kaxanu an, cetindëleŋo dek napul irexëm in asëyalı arexëm an. ⁷ Këren yifaya na : Kaxanu ala aŋo mëkëñaxënd na. Er ko nedënd ala in, ejo fo ko xanand bëte. ⁸ Ar kë wurend ang këŋo ãandind eman an er kë rëwënd oñandi od eman in ko xana, mëne ngëŋ ecës el. Barikan ar kë wurend ang këŋo xadacënd Angoc Amënëk ak, er kë rëwënd aniyand and Angoc Amënëk in ko xanađ, mëne ngëŋ, anıyan and din ir din aŋ. ⁹ Kërebo barëbarand na edi ed benjekax el, gayik axana këne xanaye oyekax or këne rinde ol and kë ħat amëd aŋ angëmëne

abo cenax na. ¹⁰ Awa ga nang këne ako beŋo, dindëne benjekax ebi yeraxën dek adofa okërecëŋ ocandaŵ ok.

¹¹ Watin oñëgw oko ro ang rafëk ak ata kën nang mëne wëno dëŋ yëgwëlik. ¹² Dek bër këbi yândind enëbi cëkwënd në end er ex gër eman bën këŋun nëyälind enun kac këdi kënun yäna enun dixërand në end ga femërand end ecës ed Kërisët gër kërëwa eŋ. ¹³ Gayik wa bën ber kënebi xacend ben dëŋ ani tefend er rek acariya in. Barikan emat fo yändi këbi : wën enun kac eni dafënaxënënd mëne në end endebën xacaxën kënun. ¹⁴ Wëno emat fo ex end këme rafëna eŋ : end kërëwa ir Yesu Kërisët Axwën arebi eŋ. Gër kërëwa ijo šës këme do ecës elo šapërëreli këbo wëno gë bend gër ngwën ro beŋ. Mëŋ ex wëno ame box na ga këme sëfënd bend gër ngwën ro beŋ. ¹⁵ Gayik wa gër Kaxanu xac këni nde, ani kace na nde, mëŋ ax gena eŋo këŋo balënd. Er ko balënd in ex ola oxašax or šot këy ol. ¹⁶ Dek bër kë sëfënd osëyali or apela aŋo ro bën, Kaxanu ayël këbi yël obetak ol do gë axayënan in ang babi yëlënd bulunda ir Isërayel ak.

¹⁷ Gërëgako ala kërëxe bašën na toro inŋ gayik gër eman endam ro ex bambënut band šot këme në end Yesu baŋ. ¹⁸ Bëmaÿe, Axwën Yesu Kërisët yëlëleŋun oyekax orexëm ol gër onden ondewën ! Amen !

Kayëta ir

Bëhefes Bën

Ecëmar el

1 Wëno Pol, batula ir Yesu Kërisët hi këme ang
ÿandi këno Kaxanu ak. Wëno këjun
ÿëgwënëlinde wën bëwënëk bër xwëta këno Yesu
Kërisët gër angol and Efes bën. ² Awa Faba irebi
Kaxanu do gë Yesu Kërisët, Axwën arebi an,
yëlëlenun oyekax ol do gë obetak ol !

Oyekax or gër Yesu Kërisët ol

³ Duwanëñone Kaxanu, Sëm ir Yesu Kërisët, Axwën
arebi an ! Mëñ yël këbo obetak or ex yo yañ gër orën
paß gë Angoc andexëm añ në end ga bar këne gë
Yesu Kërisët. ⁴ Do ga bar këne ako gë Yesu Kërisët,
sanaxën këbo Kaxanu damana exo dixën ngwën in
ene giye bëwënëk, bër gë end kënebo nëp këm gër
ogës odexëm. Ga ñan këbo ⁵ sanaxën këbo anëka fo
ene giye obaß orexëm paß gë Yesu Kërisët. Mondako
ri ko gayik aÿandi aÿandi këno ebo masin onënga
orexëm ol. ⁶ Mondako ri ko enëño cëkwaxënënde
Kaxanu në end oyekax oşaraxik orexëm or yël këbo
ga abar bar këne gë Asëñiŵ ar ex pëlôt gër yomb
irexëm an.

⁷ Kaxanu aracët racët këbo do seban këbo bamena bandebi baŋ gë oŝat or Yesu oŋ. Mondako w̃asin këbo ang rafëk oyekax orexëm ak. ⁸ Ata Kaxanu, oyekax olo yël këbo ngëŋ mbaŋ, ene cotaxëne dek orenik ol do gë onangëran ol. ⁹ Anangën nangën këbo enjekax end ỹandi baŋo exo di do ŝon baxo eŋ. Ata mondako fëna baxo exo di paß gë Asëñiŵ arexëm. ¹⁰ Er fëna baxo ijo aħata ko ħata gër bakey baapelatar : exo bar beŷ bën dek gër owun or Yesu Kërisët, hik bebër gër orën, hik bebër gër ebar ro.

¹¹ Ga bar këne gë Yesu Kërisët ŝotaxën këne er beŷa baxo Kaxanu ayël yël këbo in, biyi bër sana babo anëka fo ang fëna baxo ak. ¹² Awa mondako ri ko end biyi bëŷanar bër xwëta kënëŋone Yesu Kërisët, ene duwaxëne enjaran endexëm eŋ.

¹³ Ga bar kën gë mën, wëlxën kën eyeyan ed däl el, Atëfëtan and apexa andewën aŋ. Bëte ex gixën nanganëme ir mëne mën xwën këjun in, Kaxanu ayël yël këjun Angoc Amënëk and beŷa baŋun aŋ gayik axwëta xwëta këno Yesu Kërisët. ¹⁴ Angoc Amënëk aŋ ex oŝet or ỹana këbo eyël ol damana ex ŋataxënu er fenin këbo Kaxanu gër apexa and rin këbo in, ene duwaxëne enjaran endexëm eŋ.

Cale ind Pol iŋ

¹⁵ Wëno awël wël këme ga këni re bela bën mëne

wën mbañ xwëta këno Axwën Yesu. Bëte mbañ këñun balënd end dek bërëwāk endexëm eñ. Mëñ ex, ¹⁶ lañ këmo šëkwand Kaxanu endewën eñ and këmun šalenënd añ. ¹⁷ Kaxanu ir Axwën arebi Yesu Kërisët, mëñ ar ex Faba ir gë enjaran an, këmo xarand eñun yël Angoc and orenik, and këbo nanganënënd enim noño hi ko añ. ¹⁸ Axara këmo xarand Kaxanu eñun ñoba gër onden ondegwën mëñ kën nangaxën ang xëbënëk er këni yarënd bër wāc këbi gër apexa in do ine ex enjaran etëm end fenin këbi bërëwāk eñ. ¹⁹ Bëte axara këmo xarand eñun nangën ang rafëk do ang yāñëk gë etël këm, panga ind šotën këbo biyi bër wāk endexëm bën. Ang rafëk panga indexëm ak wāsin këbo Kaxanu ²⁰ and xanin këño Yesu Kërisët gër ecës do wëla këño yëpax ko gër liw irexëm yañ gër orën añ. ²¹ Yesu Kërisët mondako wëña këbi ngëñ dek bangoc band këbi wëñand bela bañ, gë bakeyax bañ do gë dek band bayik bañ. Owac orexëm ol xucak dek omac od këni wācërand gër ngwën iño ro do gër ind kë yowënd. ²² Awa er hik yo, Kaxanu axwët xwët ko dila gër mbëña ind Yesu Kërisët. Bëte mëñ sana këño exo gi emun end Amara and bërëwāk endexëm eñ. ²³ Amara año ex eman endexëm eñ do gë Angoc andexëm añ yëmëk dek ex canayaxën pañ gë mëñ dek ola orexëm ol.

Apexa and paß gë oyekax aŋ

2 Wën cëŋ, anëka hi ban de bësësëk në end bamena bandewën, në end beñëŋëanax bëndewën. ² Awure ban wurend gër mbëña ind bebër gër ngwën ro, dila gër angoc and wunëk mërëxand ir orën gë ebar aŋ. Angoc aŋo këbi šoñënd bër këŋo wëšenënd Kaxanu bën. ³ Ado biyi dek dëŋ ang bela bëjo ak hi bane. Oñandi oñëŋëanax od eman ok bane rinde do sëf bane wayët banjelan bandebi fo. Do mëŋ xoÿëanaxën babo Kaxanu ang xoÿën këbi bëjo ak. ⁴ Barikan mbaŋ këŋo xaÿënanënd biyi bela bën do mbaŋ ãan këbo mëŋ ex ⁵ and nemi bane në end bamena bandebi aŋ, abakali bakaliw këbo gër aniyan andamat gë Yesu Kërisët yatir xanin këŋo gër ecës. Ata gë oyekax or Kaxanu ol fex kën. ⁶ Ga bar këne gë Yesu Kërisët xaninaxën këbo gër ecës andamat do wëla këbo ene ñëpaxëye në er ebat yaŋ gër orën.

⁷ Mondako ri ko Kaxanu ebi masinaxën bela bën, ang këni bëtëraw bandëwëra baŋ, ang rafëk oyekax ošaraxik orexëm, or necët ko gër Yesu Kërisët në endebi ol. ⁸ Enimin, wën ga xwëta këno Kaxanu fexëanaxën këŋun gë oyekax orexëm ol. Eŋo oyël orexëm ex, ax gena er feyët kën gë andewën. ⁹ Awa gayikako ax gena në end benjekax bend ri kën gë andewën fexaxën kën, ala ax kor na exo daf na. ¹⁰ Enimin biyi Kaxanu ri këbo, bëte mëŋ

fo nëngwët këbo ga bar këne gë Yesu Kërisët ene dixënënde benjekax bend xëñëna baxo elod gër ÿanar beḡ.

Ebarër ed gër Yesu Kërisët el

¹¹ Awa kwitayin ang hi ban gër ÿanar ak wën bër anun dëwë na Bëšëwif bën. Bëšëwif bën, axacër këni xacërend. Ado ga kënun rend mëne wën bëxacërex hi kën, oxac orebën olo or gër eman fo ex, or ri këni bela fo ex. ¹² Ata wën amëd aḡo, ano kwëta bana Yesu Kërisët, aḡun ñap bana en dëg gër ebar ed Isërayel. Bëliyër hi ban gër bulunda ir beber beya këbi Kaxanu. Wën an ter bana pere gë mëḡ, ÿoweÿ aban yar na gër ndexëm do ano nang bana. ¹³ Barikan gëregako, ga bar kën ako gë Yesu Kërisët, ado ga hawëta bano Kaxanu, gë ošat or Yesu Kërisët oḡ sëkaliw këḡun gër ndexëm. ¹⁴ Gayik wa në end Yesu Kërisët šotaxën këne aketëxeta aḡ, mëḡ ar bar këbi eni gi ar abat Bëšëwif bën gë bër ax gena Bëšëwif bën. Ayam yam ko amëḡ and šapëreli bafi xali šusëraxën bani aḡ. ¹⁵ Kaxanu ayepën yepën ko gë ecës ed Yesu Kërisët el beber šëba bax gër šapela band Moyis do bafi šapëreлинд Bëšëwif gë bër ax gena Bëšëwif bën. Mondako ri ko ebi baraxën Bëšëwif bën gë bër ax gena Bëšëwif bën eni wëlërend do eni gi dek bulunda ibat. ¹⁶ Yesu Kërisët šësëk gër kërëwa ebi baraxën eni gi eman emat do eni wëlërend gë Kaxanu. Mondako law

ko angoyëra and Bëšëwif gë bër ax gena Bëšëwif aņ. ¹⁷ Ata ebo tēfëtanaxën angwëlëra aņ biyi bër sëka baņo Kaxanu gë wën bër ĥawëta baņo bën yow baxo Yesu Kërisët. ¹⁸ Enimin, ga bar këne gë mëņ biyi dek, Bëšëwif bër ax gena Bëšëwif, šotaxën këne fëña ir ene ŋataxëne gër Faba gë panga ind Angoc Amënek iņ.

¹⁹ Awa mëņ ex, gërëgako wën bër ax gena Bëšëwif bën bulunda ir Kaxanu hi kën, bër ekun edexëm hi kën, an box na bëliyer, an box na bër yeġa. ²⁰ Wën ang oxaỹ hi kën do Kaxanu wëd këņun exo bayaxën Aciw andexëm aņ. Edëd ed aciw aņo el exëni obatula ok, gë bëlawënel bën do Yesu Kërisët ex ekaỹ ekëla el. ²¹ Gër ndexëm kë yëpand oxaỹ or këni bayaxënënd oņ ex gixën Aciw amënek and Axwën. ²² Wën dek bëte, ga bar kën ako gë mëņ, abar bar kën gë bërëwāk bëšëxe bën do hi kën andamat iciw ind gër ed lëg ko Kaxanu gë Angoc andexëm iņ.

Andiyen and Pol aņ

3 Mëņ ex, wëno Pol ašale këmo šalend Kaxanu, wëno andepëra and këņo riyeninënd Yesu Kërisët aņ në end wën bër ax gena Bëšëwif. ² Yëla këme awël dëņ wël kën mëne Kaxanu rin ke oyekax ga fana ke mun nangën oyekax olo. ³ Yama er šon baxo elod akarëk in ga nangën ke nde do wëno këmun yëgwënëlınd bengas bëpënëfëne bëņo. ⁴ And kën fën aņ, axor kën xor eņun pëni ang këme watënd kerët

er şonayak gër Yesu Kërisët in. ⁵ Akarëk aŋ, er şonaya bax ijo, Kaxanu abi nangën bana bela bër bandëwëra band anëka fo bën. Gërëgako Kaxanu anangën nangën këbi gë Angoc andexëm aŋ obatula omënëk od ex bëlawënël bërexëm ok. ⁶ Er nangën këbi mëne bër ax gena Bëşëwif bën aşot këni şot er fenin babi Bëşëwif in. Eman emat hi këni do erebat beya këbi paş gë Yesu Kërisët ga wã këni Atëfëtan aŋ.

⁷ Wëno gë oyekax or Kaxanu ol hixën këme ariyenin arexëm gë panga indexëm in. ⁸ Ayël yël ke oyekax olo wëno ar xurik ex ba gër dek bërëwãk mëni tëfëtanaxënënd napul isëm ir Yesu Kërisët in bër ax gena Bëşëwif bën. ⁹ Kaxanu yël ke bëte oyekax olo mëni masinaxënënd kerët bën dek mondake hatak er şon baxo elod nand ri ko ngwën na. ¹⁰ Gërëgako, Amara aŋ yandi këno ebi nangëndërand ang rafëk orenik orexëm ak bangoc band këbi wëñand bela baŋ do gë bakeyax band ex yaŋ gër orën baŋ. ¹¹ Ang fëna baxo din ir din ak hata ko paş gë Yesu Kërisët, Axwën arebi an. ¹² Ga bar këne gë mëŋ xwëtaxën kënëŋone do şot këne ekapina ed yapëk enëŋo tëkaxënënde Kaxanu gë anjiy këm el. ¹³ Awa axara këmun xarand, këreŋun cena na gayik në endewën këme sorond : toro iŋo enjaran endewën ex.

Aŋana and Yesu Kërisët aŋ

¹⁴ Mëŋ ex, afoxi këme foxind mo cale Faba Kaxanu

¹⁵ gayik ekun ed bela ed ex yo gër ndexëm xaniwëk : hik gër orën, hik gër ebar. ¹⁶ Gayikako mëñ obetak or gë etël këm êot ko, axara këmo xarand eñun yël panga iñ pañ gë Angoc andexëm añ en kemaxën gër oñëkw orewën. ¹⁷ Axara këmo xarand Yesu Kërisët exo dëg gër oñëkw orewën gë ekwëta ed xwëta këno el en dëgaxën gër añana ang atëx and gë odëmbët otiwax fo. ¹⁸ Ata amëd año kën ÿana en korënd eñun pëni andamat gë okëreceñ ocandaw ok ang ÿangëk, ang êakëk, ang siwëk do ang songinak añana andexëm ak. ¹⁹ Mondako kën nang añana and Yesu Kërisët and xucak dek orenik orewën añ xali Kaxanu eñun ñëmën gë dek ola orexëm ol.

²⁰ Awa Kaxanu, mëñ ar xorëk exo di dek gë etël këm an, ayël këbo yël nëmëc gër ga këñëño xaraye do nëmëc gër ga këne yare. ²¹ Cëkwënëñone gër Amara and Yesu Kërisët ang kë bëtëraw dek bandëwëra band bela bañ xali din ir din. Amen !

Eman emat

4 Wëno andepëra and Axwën Yesu añ ga re këme, kemënayin en wurend ang ÿapëk eni wurend bër sana këbi Kaxanu ak. ² Banayindën gër dek bandixa bandewën, en nënga do en buñand. Buñarindën andewën rewën do balëringdëleñun. ³ Gayikako Angoc and Kaxanu añ bar këñun xali hi kën eman emat, kemënayin en kwëtaya angwëlëra añ.

⁴ Enimin, eman emat fo ex,
 Angoc amat fo ex,
 Bëte wën Kaxanu sana këñun,
 En yarënd erebat fo.

⁵ Axwën abat fo ex,
 Ekwëta ebat fo ex
 Do xobuyi obat fo ex.

⁶ Kaxanu ibat fo ex
 Do mëñ fo hik Sëm ir bela dek,
 Mëñ xorëk beÿ dek,
 Mëñ kë riyenind gër ola or bela dek
 Do hi ko gër bela dek.

⁷ Barikan biyi dek ang hi këne ak, ala kala anjëla pit
 yël këño na Kaxanu do Yesu Kërisët ex ar kë şetërend
 an. ⁸ Mëñ ÿëgwaxën këni gër Akayëta and Kaxanu :

« Aye ye ko yañ gër ed songinak,
 Awëlali wëlali këbi bërangoÿëra gë mëñ,
 Banjëla yëlëra këbi bela bën »

⁹ Do ineŵa wacayak aye ye ko yañ ? Ax gena nde
 mëne aşëla şëla ko gër ngwën ind bëşësëk, gëd gër
 ebar ? ¹⁰ Ar şëla bax gër bëşësëk an fo yek bëte yañ gër
 orën, exo munaxën bebët ir ex yo. ¹¹ Mëñ yël këbi bër
 gër Amara bën banjëla band eni gi : bëjo obatula, bëjo
 bëlaŵënel, bëjo bëfemëran, bëjo bëxadac bër bamara,

bëjo bëte bësëyali bër eyeyan edexëm. ¹² Mondako ri ko enëbi tÿyalixënënd andiyen and Kaxanu aŋ bërëwãk bën eni gixën eman end Yesu Kërisët emat ¹³ xali ene cotaxëne biyi dek ekwëta edebat do enëjo nange andamat Asëniw̃ ar Kaxanu an. Mondako ri ko bëte ene ñatënaxëne ola or faÿërak or Yesu Kërisët ol. ¹⁴ Angëmëne mondako ex, ane bayiye na ang obaâ or kënëbi yifand bësëyali bësitik fo. Bëte ane bayiye ang batëxësëx band kë xocelirand ekoc fo, ala abo mëkëñaxën na, ala abo nambeli na. ¹⁵ Barikan ga këne reyãnde gë aŋana fo ðal in këne nëngwëtaye xali ene tÿkëne ola or Yesu Kërisët ol, mëj ar ex emun end Amara an. ¹⁶ Ang kë šosarënd aye owal gër eman ak exo dafaxën ala an, biyi dek mondako bar këne do në edaf ex gër aŋana eman emat end hi këne eŋ.

Aniyan angašax and okëreceŋ aŋ

¹⁷ Awa baxëtïn er këmun felënd in, er këme reyãnd gër oãac or Axwën in : këren wurënd na ang këni wurend bër aŋo nange na Yesu Kërisët bën gë ofëni rëx or banjëlan bandebën ol. ¹⁸ Onden ondebën oŋ šiwëk ga këno wëšenënd Kaxanu do aniyan and ko yëlënd Angoc andexem aŋ ani cote na gayik ano nange na Kaxanu. ¹⁹ Ga këni wurend gë ašëfën këm yëlayaxën këni gër eñac do këbi balënd wayët bemuyaraxik fo.

²⁰ Barikan wën bër sëyak end Yesu Kërisët bën, ax gena mondako ÿapëk en wurend. ²¹ Angëmëne enimin

awël dëj wël kën end Yesu eñ do angëmëne asëyali sëyali kënun ðal irexëm in, ²² afo en cudëta ang acud akarëk fo ola oxarëk orewën ol mëne ngëj en teb oñandi oñëñenax ok, betëmbak bend wër banun beñ gayik ayifa këñun yifand eñun mëlaxën gër ecës.

²³ Tebënino Angoc and Kaxanu añ exo nëngwët oñëkw orewën oñ do gë onden ondwën. ²⁴ Cudayin ang acud angaâxax fo ola or nëngwëtën këñun Kaxanu ol, en gixën bër ðal do en wurexënënd aniyan and êenene, aniyan amënëk.

²⁵ Mëñ ex, tebin enëgwëê eñ ! Ala kala yeyanindëlexo ðal in gër aâandañ gayik ang owal od eman emat fo hi këne. ²⁶ Angëmëne axoñ xoñ kën, këren mendëra na. Këren pena na oxoñ ol xali ex nëka, eñan eñ kerëx cëla na gër oxoñ orewën. ²⁷ Këreno teb na âabucara in eñun ðila. ²⁸ Ar bax rekand an, tebëlexo orek ol. Kemënayindëlexo exo cot er sëw ko mëñ dëj, eño dëcaxënënd ar êëndëk an. ²⁹ Eyeyan eñëñenax kërex canënd na gër osëñ orewën. Eyeyan ejekax fo, ed kë baâënd ekwëta, ed këbi rinënd oyekax bër kë wëlënd bën ñapëk ex canënd gër osëñ orewën. ³⁰ Angoc Amënëk and ex nanganëme ir mëne Kaxanu xwën këñun añ, kërexo camina na gër oñëkw orewën gayik mëñ yël këñun Kaxanu xali yatir ko ñata epexën edewën el. ³¹ Epena ed oxoñ el, batakëra bañ, oxeyër oñ, odenar ok, gë owër ol do gë oxey or ex yo, dëxëtal ex gër Amara andewën. ³² Masindëringën onënga ol,

bëngwin mbaᅇ do balëringdëleᅇun mbaᅇ.
Tebandëringdën ang këᅇun sebanënd Kaxanu ak paᅇ
gë Yesu Kërisët.

Aniyan and gë angoben aᅇ

5 Awa tëfëtelindëno ngëᅇ Kaxanu gayikako obaᅇ or
pëlot gër yomb irexëm hi kë. ² Balëringdëleᅇun
gër aniyan andewën ang këᅇo balënd Yesu Kërisët
endëbi ak xali yëlaya ko mëᅇ dëᅇ ᅇadaxa ir nëngan
këᅇo Kaxanu në endëbi.

³ Asëk alakirand fo in, gë obuyar or ex yo ol, gë
aᅇana and kodï aᅇ kërex gi na gër Amara andewën.
Ax ñape na eni dind mondako bër ex bëwënëk
bën. ⁴ Cëkwayindëno Kaxanu do en teb eyeyandëra ed
beñëᅇnax el, gë ed ofëcak këm el, gë ekwënd ed
becëfëñaxik el. ⁵ Nangin aye mëne bër watak asëk
alakirand fo bën, ge bër kë buyarëñayand bën do ge
bër ᅇanëk kodï bën ani cot na owun or Yesu Kërisët
do gë Kaxanu olgayik aᅇana and kodï aᅇ andamat ex
gë ekëla ed olaᅇ el.

⁶ Ala këreᅇun yifa na gë eyeyan enëngax. Në eᅇo
këbi xitixën Kaxanu bër këᅇo wëᅇenënd bën. ⁷ Awa
wën këren barënd na gë bela bërako bën. ⁸ Damana en
maxën end Axwën eᅇ, ola orewën ol ecamëdan fo hi
bax. Barikan gërëgako, gër angoben and Axwën
hi kë. Wureyiden ang obaᅇ or angoben fo. ⁹ Bela bër
kë wurend gër angoben bën anënga këni nëngand,

ŝenene hi këni do bër däl hi këni gër dek bebër këni rind. ¹⁰ Calayindën en di er hãn ko Axwën in ¹¹ do kërenëbi barand na bër watak bend gë ofecak këm bën, bend gër ecamëdan beŋ, ado pëlëtindënëbi.

¹² Enimin, er këni rind gër ecamëdan in, ašëfën šëfënëk edeyã el. ¹³ Barikan angoben aŋ dek kë fëlëtënd beŋo and kë hãba aŋ. ¹⁴ Do dek er hãbak in axana kë xanand angobën aŋ. Mëŋ rexën ko :

« Nëngëtal wëj ar ki rašënd an,
Kanil mërëxand ir bëšësek,
Ata ki hãba Yesu Kërisët. »

¹⁵ Awa kamanindën aye ang kën wurend ak : wureyindën ang bërenik fo, këren gi na ber ang bër gë onden këm. ¹⁶ Nand kën šot amëd and en di enjekax na, diyin enjekax eŋo. Këren teb na ex kuca axuca fo amëd aŋo gayik bela bër gë okey oko bën, beñëŋënax fo wata këni. ¹⁷ Awa calayindën eŋun pëni er yãndi këŋo Axwën en dind in, këren gi na bëfënrëx.

¹⁸ Nëmindën gë Angoc Amënëk aŋ, këreŋun ñawënd na ngoy gayik ngoy iŋ beñëŋënax fo kë lënanënd.

¹⁹ Kemëndëringdën gër ekwëta, ñëwërayindën ojëkan od këŋun yëlënd Angoc and Kaxanu ok, ojëkan od cale ok. Nëwërayindën, yasindëno Axwën an gë oŵëkw orewën oŋ dek. ²⁰ Cëkwayindëno Faba Kaxanu nand ex yo, në end ex yo gër oŵac or Axwën arebi

Yesu Kërisët.

End bësoxari do gë bësoşan eŋ

²¹ Buŋarindën andewën rewën do pëbindëno mondako Yesu Kërisët. ²² Awa wën bësoxari bën baxëtindën end bëcën bëndebën eŋ ang kën baxëtënd end Axwën ak. ²³ Gayik wa icën iŋ ex emun end alindaŵ eŋ ang hi ko Yesu Kërisët ak emun end Amara and fexën ko eŋ. ²⁴ Ata ang këni baxëtënd end Yesu Kërisët ak bër gër Amara andexëm bën, bësoxari bën dek mondako ŷapëk eni baxëtënd end bëcën bëndebën eŋ.

²⁵ Wëj icën in, ŋanëlo alindax ang ĥan ko Yesu Kërisët Amara andexëm ak xali yëlaya ko mëŋ dëŋ gër ecës. ²⁶ Exo mënëanaxën Amara aŋ gë men oŋ do gë eyeyan ed Kaxanu el rixën ko mondako. ²⁷ Er ŷandi këŋo eni gi bër gër Amara bën : beyekax, bër garëgar, bër ŷenene, bëwënëk do bër gë end këyëbi nöp këm. ²⁸ Awa icën iŋ, ang ĥan ko eman endexëm ak ŷapëk eŋo ŋan alindaŵ. Ar ĥan këŋo asoxari arexëm an mëŋ dëŋ ĥanayak. ²⁹ Ax gena nde ala an axo cusënd na eman endexëm eŋ ? Barikan alëba ko lëband, afëyëpëy ko fëyëpëyënd, ang këbo rinënd Yesu Kërisët biyi bër gër Amara andexëm ak ³⁰ gayik owal od eman endexëm hi këne. ³¹ « Mëŋ ex, Asoşan an aseb këbi seb nëm gë sëm do eni dëkër gë asoxari arexëm an xali bën bëxi eni gi eman emat. » ³² Gër eyeyan elo,

dal isëm şonayak. Wëno ga re këme mëne amatinali and anëkëra and Yesu Kërisët gë Amara andexëm ex. ³³ Gër ga hik yo, ala kala ñanëleño alindaŵ ang ñhanaya ko ak do asoxari an pëbindëleño icën indexëm iñ.

End obaş do gë bëxarëk bërebën eñ

6 Wën obaş ol, baxëtënindënëbi bëxarëk bërewën bën gayikako bër Axwën Yesu hi kën. Edi ed mondako el şenene ex. ² Akayëta and Kaxanu rek : « Pëbindëbi sorix gë norix ». Apela año ex añanar and gë er beya ko Kaxanu añ. ³ Er beya ko mëne ar kë sëf apela año an, abeta ko beta do exo cot aniyan acakax gër ebar ro.

⁴ Wën opaba ok, kadacindënëbi şenene obaş orewën ol do bakalindënëbi gër fëña ir ñandi këño Axwën, kërebi dëbëlëband na endewën eñ.

End okadëp do gë bëxwën bërebën eñ

⁵ Wën bër ex okadëp bën, baxëtënindënëbi bëxwën bërewën bër ex gër ebar ro bën. Yëdayindënëbi do pëbindënëbi gë emëkw epeşax ang këno fëbënd Yesu Kërisët ak. ⁶ Ax gena en dind mondako gër ogës odebën fo nangëde bër kë şaland enëbi ñan bela fo. Dindën mondako ang okadëp od Yesu Kërisët od kë rind oñandi od Kaxanu ok gë oñëkw orebën oñ dek. ⁷ Diyindën andiyen andebën añ gë oñëkw ofeşax

nangëde Axwën an këno riyeninënd fo, bari ax gena ang okadëp od bela. ⁸ Ala ar er yo, hi ko xadëp, axo gena xadëp, nangëlexo mëne axana ko xana gër Axwën ata ceƴ ang riyeni ko ak. ⁹ Bëte wën bëxwën bën, mëlayayindënëbi šenene okadëp odewën ok, kërenëbi besarand na. Nangin mëne Axwën abat šot këno wën gë bën ƴaŋ gër orën do gër ogës odexëm, bela bën dek gwër fo hi këni.

Emer ed gë bangoc bañëñëxax el

¹⁰ End këme xor de me ŋataxën eŋ : calayindën en kem gë dek panga ind Axwën in. ¹¹ Kaxanu ayël ƴël këñun dek oÿënga or emer oŋ. Awa baxayindën oÿënga oŋo en kwëša aye mëñ këñun sëkwanaxën šabucara and këño ƴandi eñun mereli aŋ. ¹² Enimin, emer elo ax gena ed gë bela. Ed gë bangoc bañëñëxax ex : bangoc band ƴaŋ gër orën band këbi wëñand bela gë ecamëdan baŋ, gë bangoc bakeÿax baŋ do gë dek band bayik baŋ. ¹³ Awa medindën dek oÿënga or emer or ƴël këñun Kaxanu oŋ, mëñ këñ xwëšaxën aye yatir emer.

¹⁴ Kemënayin gër emer elo : kapayindën däl in ang apëxw fo, cudayindën or šenene ol ang acud and ƴawale fo. ¹⁵ Pedayindën Atëfëtan and kë ƴëlënd obetak aŋ, mëne ngëñ : giyindën bëwëlëk bër en ƴe gër edeyara. ¹⁶ Medindën bëte ang angwak fo ekwëta ed xwëta këno Yesu Kërisët el. Mëñ kë ƴana eñun

kakanax n nd b p s b nd g  okodux b nd k n n
 lejax n nd A y n nax an. ¹⁷ C xwayind n Apexa and
 y l k n n Kaxanu a  ang ekamote ed emer fo.
 Med nd n b te ang duxuma fo eyeyan edex m ed
 k n n y l nd Angoc Am n k el. ¹⁸ Caleyind n nand ex
 yo g  Angoc and Kaxanu a . Karayind no er ex yo
 do calenind n bi dek okerece  ok, k ren nambinand



na. ¹⁹ Calenindëne wëno bëte exe dëca Kaxanu me cotaxënënd er këme reya in do me kapinaxënënd gër epemëra ed er šonëtëk Atëfëtan in. ²⁰ Ado wëno në eņo hixën këme andepëra ga sana ke Yesu Kërisët me gi afemëran ar Atëfëtan andexëm do me kapinand gër etëfët elo ang ãapëk ak.

Ofelar ol

²¹ Endam eņ cëņ, mëne bebër këme rind bën, dek këņun nangënëx Tišik, mëņ ar ex imaÿe indebi ind Ĥhan kënëņone aye biyi dek iņ do hi ko ariyenin ar Kaxanu ar mokwëta. ²² Mëņ lawënëli këmo eņun pelërax ang hi këmi ro ak do eņun kemën gër ekwëta.

²³ Faba Kaxanu do gë Yesu Kërisët, Axwën arebi an, yëlëlenun obetak ol, aņana aņ do gë ekwëta el. ²⁴ Dek bër Ĥhan këņo din ir din Yesu Kërisët Axwën arebi bën, cotëlexëni oyekax ol !

Kayëta ir

Bëfilip Bën

Ecëmar el

1 Wëno Pol do gë Timote, okadëp od Yesu Kërisët ok, këjun ÿëgwënëlinde wën dek bëwënëk bër Yesu Kërisët bër ex gër Angol and Filip bën, gë bëlëngw bën do gë ojakër od gër Amara andewën ok. ²Kaxanu, Faba irebi do gë Yesu Kërisët Axwën, arebi an, yëlëlenun oyekax ol do gë obetak ol !

Cale ind Pol in

³Ašëkwa këmo šëkwand Kaxanu nand këmun xwita yo. ⁴Ašalën këmun šalënënd wën dek, do nand ke šalend yo gë onënga fo këme šalend. ⁵Mondako këmun šalënënd gayik wën ke rëcarand gër andiyen and epemëran ed Atëfëtan el, elod yatir wã kën xali gërëgako. ⁶Aye fëni ke mëne Kaxanu, mëñ ar ÿanak andiyen año gër ola orewën an, asëf ko sëf xali exo nãta gë akey and ko bakaw Yesu Kërisët añ. ⁷Aÿap ÿapëk mun yëlanënd wën dek mondako gayik gë emëkw edam el dek ke balënd endewën eñ. Hi këme gër epëra, hi këme gër eyakan ed Atëfëtan ebi kemënañën bela bën, wën gë wëno oyekax obat bar këbo. ⁸Enimin, Kaxanu ex sede iram in mëne gë

emëkw edam el dek ãan këmum, ang ãan këñun Yesu Kërisët ak.

⁹ Er këmum xaranënd and këme ãalend añ, añana andewën añ ex bašërend xali en nangëra do eñun pënind ãenene beñ bën dek. ¹⁰ Ata fo këñ ãana en nangënd epitëndër ed er xëbënëk in, en gixën bër ðal, bër gë end këñëbi nëp këm xali yatir ko bakaw Yesu Kërisët. ¹¹ Or ãenene or yël këñun Yesu Kërisët ol, ašanaya kë ãanaye aye gër ola orewën eno cëkwaxënënd do ðuwaxënënd eno Kaxanu.

Eñañ ed Atëfëtan el

¹² Bëmañe, añandi ãandi ke en nang mëne er hi ke ijo in, wëlixënëk kaš-kaš Atëfëtan añ. ¹³ Enimin, dek ocoroða od kë nëkonand eyang ed gofërener ok do gë bela bën dek bebët ir ex yo, anang nang këni mëne në end andiyen and Yesu Kërisët fëraxën këne. ¹⁴ Ado në end ga fëra këne, xemëanaxën këni bëmañe bëndanjëm gër ekwëta ed Axwën. Në eño yëxwëra këni kaš-kaš epemëra ed eyeyan ed Kaxanu el gë anjiñ këm.

¹⁵ Bërëmar cëñ, ðal ex gë oyakërax do anjëlan and ene bañëreli këni femënd end Yesu Kërisët eñ. Barikan bëšëxen bën këni femërand gë anjëlan anjekax. ¹⁶ Bëjo ex ngëñ bër ãan ke bën, ga fëni këbi mëne Kaxanu xwët ke ro me gi sede ir Atëfëtan and Yesu. ¹⁷ Xarak bër kë reyarand end Yesu Kërisët gë oñandi od eni

wëli bën, anjëlan andebën aŋ ax yex na. Er këni şaland me toro nëmëc gër ed fëra këne ro.

¹⁸ Angëmëne end Yesu Kërisët eŋ gë anjëlan añëŋëanax këni sëfëtënd ba gë däl dëŋ, axe bale na ! Gër ga hik yo wëno në enëngandëraxe do anëngandëra ke nëngandëra bëte. ¹⁹ Aye nang këme mëne gër ga şenarak yo endey eŋo, wëno afex këme fex gayik wën aşalen këne şalenënd do arëca ke rëca Angoc and Yesu Kërisët aŋ. ²⁰ Barikan er këme şëninđ gë enëkan in, er këme yarënd in, gë emëkw el dek xwëta këme mëne gërëgako ang din ir din ak, enjaran end Yesu Kërisët eŋ aşanaya kë şanaya gër eman endam, bayi këme abëngw ba laŋ këne. Angëmëne mondako ex, yoweÿ axe cëfënan na. ²¹ Wëno cëŋ Yesu Kërisët ex anıyan andam aŋ do ecës el ofëcak oram fo ex. ²² Barikan angëmëne aye yek me bayi ga këme wurend me tëfaxën andıyen andam gër beki beŋo end këme sana eŋ, ame nange na. ²³ Oñand oki ke nëÿalırand gër onden : bandëmar aÿandi ke yandınd me cës mëŋ këme ye gër ed exo Yesu Kërisët. Ata wëno eŋo yëmbëk exe yexënan. ²⁴ Barikan në endewën na, bayıl eme ga këme wurend saxëk. ²⁵ Ado endey eŋo end fëni ke dëŋ ex, anang nang këme mëne abayi këme bayi abëngw mun kemëanaxënënd wën dek, en cotaxën nëmëc ekwëta el do eŋun nëngandëraxënënd. ²⁶ Abakali këme bakali gër ndewën mëŋ këŋun yana eŋun nëngandërand din end Yesu Kërisët eŋ sam ene

watënd gašëxe.

²⁷ Barikan fo ejo këmun sebënanënd : bandixa bandewën baŋ gil ex band šenene ang rek Atëfëtan and Yesu Kërisët and sëyali kënun ak. Angëmëne anëngali nëngali këmun, amun nëngalex na, wëлиндëleme ga këni rend mëne axemëna xemëna kën gër angwëlëra, gë emëkw ebat kën xaxërënd ex ñañ ekwëta ed kë yëlënd Atëfëtan el. ²⁸ Bër këjun wërelind bën, kërenëbi tebe na enun dëgën ojomb ok. Angëmëne mondako ri kën, ata kë hi nanganëme ir mëne bën bër nambërak ex do mëne gër ndewën nanganëme ir anëka fex kën. ²⁹ Enimin Kaxanu wa yël këjun oyekax or eno diyeninënd Yesu Kërisët do bëte en torond në endexëm na. ³⁰ Eyo axaxër kën xaxërënd ang bane watënd ga këme xaxër ak do gërëgako awël kën wël bëte ga këni yeyan mëne gër okaxër oŋo bayi këme.

Ola or Yesu Kërisët ol

2 Awa angëmëne wën axëmëndër kën xemëndërënd ga bar kën gër Yesu Kërisët, angëmëne gë ebalër edewën el arëcar kën rëcarënd, angëmëne Angoc and Kaxanu aŋ ayël këjun yëlënd angwëlëra aŋ gër amara andewën do angëmëne gër oŋëkw orewën axaŷënan do gë etebandër exëna, ² wureyindën mondako ene bašëanaxën onëngan ol. Pëniyindëleŋun beŷ bën andamat do cotin ebalër ebat, onden omat, anjëlan

amat gër oŵëkw orewën. ³ Banayindën do nëkonindënëbi bëcandaŵ bën ang bër xwuca këjun ekëbën fo. Yoweỹ këren dind na gë ambañëra, bëte yoweỹ këren dind na gë ndafënan. ⁴ Ala kala balindëleño end boşandaŵ eñ, këreño balënd na bend gaf irexëm fo. ⁵ Gër amara andewën, ola orewën ol gilex ang or Yesu Kërisët ak :

⁶ Ado ga hi këni ola obat gë Kaxanu, abaxo xemën na exo ŵasinaya na gwër gë Kaxanu. ⁷ Barikan mëñ dëñ sebu bax dek er hi ko in exo gixën xadëp, ata ola orexëm ol hik ang or bela ak, owati orexëm ol ang ala ar toc fo bax. ⁸ Gë andexëm bana baxo xali ŵa ko exo cës, ecës ed mo pika gër kërëwa el. ⁹ Në end ga ri ko mondako, Kaxanu şud këño owun ol. do yël këño oŵac or nëmëcak dek oŵac or ex yo, ¹⁰ eni poxinënënd dek bela bën gër lëngw irexëm do eni duwand oŵac or Yesu hi këni bër gër orën, hi këni bër gër ebar ba bër dila gër ebar. ¹¹ Do ala kala gë eyeyan end enëng endexëm el, ko yana exo dend mëne Yesu Kërisët ex Axwën an. Ata mondako këno yana eno duwand bëte Faba Kaxanu.

Aniyan and oxëreceñ añ

¹² Wën bëmaÿe bënd ke balënd mbañ bëño, gayiyako din këne wëlänenënd, wëlänenindëne nëmëc gërëgako nand këne watërënde na, ax gena nand bayik ane watërënde na fo. Awa canayayindëlex gër ola orewën

mëne afex fex kën gë epëb el do gë eyëda el Kaxanu el. ¹³ Mëñ kënjun yëlënd oñandi ok do ojañ od en dixënënd bend ñan ko mëñ beñ.

¹⁴ Diyindën er hik yo gë odendëran këm, gë ecembëtëndër këm. ¹⁵ Ata kën hi obaâ or Kaxanu or gë end kënëbi nöp këm, bëwënëk bër kē watind ang oñal fo mërëxand ir bela bësëmbak do bëyëñenax bër gër ngwën ro ¹⁶ ga hi kën ako bëwëlaya bër eyeyan ed kē yëlënd aniyan bën. Gë endey' eño ke nëngandërad yatir ko bakaw Yesu Kërisët, gayik awati kē wati kerët mëne gë andiyen and këmo rinënd Kaxanu año, abame hërëra na ahërëra fo, abame sorora na asorora fo. ¹⁷ Ekwëta ed xwëta këno wën Yesu Kërisët el ang şadaxa ir këno rinënd Kaxanu fo ex. Do ado ex gido alañ këne lañ, abaâ fo başëdome oşat oram oñ gër şadaxa irewën, awa mbañ anëngandëra ke nëngandërad andamat gë wën dek ak. ¹⁸ Wën bëte nëngandëraleñun mondako fo do nëngandëraleñun andamat gë wëno.

End Timote eñ

¹⁹ Ga xwëta këmo Axwën Yesu, ñandexën ke mo dañënëli añand Timote gër ndewën. Do and ko bakaw añ exe kemënatı wëno bëte gë benjekax bendewën bend ke sëfëtanatı beñ. ²⁰ Mëñ gabat exo ar kënjun yëlanënd benjekax ang wëno ak. Mëñ fo ex ar kënjun renëndëranënd gë emëkw epeşax an. ²¹ Dek bër bayik

bën bendebën fo këbi balënd, ax gena bend Yesu Kërisët beŋ. ²² Barikan mënŋ Timote, wën dënŋ aye nang kën ang wëlaya ko ŋenene ola orexëm ak. Ang itox ind këŋo rëcarand sëm gër andiyen fo hi ko ler gër ndam ro gër epëmëra ed Atëfëtan aŋ. ²³ Awa mënŋ ÿandexën ke mo dawënëli gër ndewën sam exe pëni aye endam eŋ. ²⁴ Ado aye nang këme ga xwëta këmo ako Axwën mëne wëno dënŋ gogo këmun nëngali.

End Epafërodit eŋ

²⁵ Epafërodit, ar lawënu bano exe mëlanu er këme wurexën in, mënŋ ex abaÿe, ar xel këmi andiyen amat an. Yëla këme gërëgako mëne aÿap ÿapëk exo maÿili. ²⁶ Mbaŋ xofi baŋo wën dek do ŋëmura baŋo ga wëlëx kën mëne aŋëxwëra ŋëxwëra baxo. ²⁷ Ata mbaŋ ŋëxwëra baxo xali dam gër ecës, barikan Kaxanu axaÿënan xaÿënan këŋo endexëm eŋ. Gë wëno ak xaÿënan këŋo këdi ke ŋëmura kaŋ-kaŋ. ²⁸ Mënŋ felaxënëli këmo exo bakali aÿand, eŋun nëngandëraxën and këno wat aŋ do wëno exe yema təkër emëkw el. ²⁹ Awa kacayidëno gë onënga fo, abaÿe irewën ex gër Axwën. Pëbindënëbi bela bër ang mënŋ ak bën. ³⁰ Në end andiyen and Yesu Kërisët eŋ yëla ko exo cës. Ecës el fece këŋo exe dëcaraxën gër ed hi bax ene dëcara wën na.

Or êenene or gër ogës od Kaxanu ol

3 Gërëgako bëmaÿe, nëngandërayindëleŋun ga hi kën ako bër Axwën. Gayikako apexa andewën ex, wëno cëŋ axe këñënd na mun ñëgwënëlinde beŋo fo beŋo fo. ² Titinalindënëbi odaŋët ok, bër ax tëyalind na êenene end Kaxanu bën. Titinalindënëbi ga këni sëyalind mëne afo enun kac en pexaxën. ³ Enimin biyi bër këne êalende gë panga ind Angoc and Kaxanu do këbo nëngandërand ga bar këne gë Yesu Kërisët hi këne bër xac kënebi enim bën. Ane kwëtaxe na bend bela beŋ.

⁴ Egel wëno, axor xor dome me kwëta bend ola oram beŋ. Awa angëmëne bela ex na bër kë yëland mëne bën aÿap ÿap këbi eni kwëtand bend ola orebën ol, wëno wa ÿap doxe nëmëc. ⁵ Wëno gër enëng end Bëyisërayel rëw këne do xac këne yatir sëk ke bakey banjongëbatas. Bëxarëk bëram bën bër andëwëra and Benëyamin hi këni. Ata Aêëwif ar rëw këno Bëêëwif dëŋ hi këme, and raf këme aŋ hi këme fariseŋ do bame sëfënd acariya and Moyis aŋ. ⁶ Ga bame balëkënalind cale ind biyi Bëêëwif iŋ bamëni rixëraxënënd okëreceŋ ok do hi bame gë end këne nëp këm paß gë or êenene or rek acariya ol.

⁷ Barikan ga xwëta këmo Yesu Kërisët, bëbër bame yëland ofëcak oram ex bën ax box na ga ke xëbënanënd. ⁸ Enimin, onang or nang këmo Yesu

Kërisët, Axwën aram ol yëmbëtak gë beÿ bën dek. Në endexëm sebaxën këme ekëbënan beÿ dek el, xali këme watënd ang bebuyaraxik fo mënj këmi xwëndër gë Yesu Kërisët. ⁹ Ga bar këmi gë mënj, hixën këme ar êenene. Awa or êenene olo, Kaxanu yël ke në end ga xwëta këmo Yesu Kërisët. Ax gena or êenene or xamën këme gë andam gër etëf ed acariya and Moyis. ¹⁰ Awa gërëgako, er xurik exe bal in ex mo nang nëmëc Yesu Kërisët mëne ngënj me nang panga ind xanin këjo gër ecës iñ do gë toro indexëm. Iyo aÿandi yandi ke mi bar gër ecës ¹¹ do angëmëne awënd wëndëk me kani gër ecës.

Aniyan and oxëreceñ añ

¹² Ax gena de anëka êot këme ejo ba anëka hâtën këme oÿwënëk ol. Barikan gër ocal bayi këme me dëkayaxën gayikako wëno bëte Yesu Kërisët lëkaya ke. ¹³ Bëmaÿe endam eñ cëñ, ame yëland na mëne anëka lëkaya këme oÿwënëk ol. Barikan ekëbënenaxik emat këme rind : me paÿaxën aye er këme êaland me dëkaya in, ame nëkonand na gand epoy. ¹⁴ Ahër këme hërënd me ñataxën gër ed kë sëlënd okaêër me cotaxën acosa and ke wacelind Kaxanu yañ gër orën añ paÿ gë Yesu Kërisët.

¹⁵ Awa biyi bër wën këne bën, yëlarandëne mondako. Do angëmëne gër ejo anjëlan andewën añ afitar fitarëk, Kaxanu aÿwasin këjun wasin er ex in.

¹⁶ Barikan fo, bayine ga këne sëfënde andamat er sëya këne gër Atëfëtan in.

¹⁷ Bëmaÿe, tëfëtelindëne wëno do nëkonindënëbi bër kë wurend ang wësin këmun ak bën. ¹⁸ Laŋ bamun felënd do në epel emun gaşëxe gë otes fo, mëne mbaŋ exëni bër kë wurend ang bër xoÿër këbi gë Yesu mëŋ ar şësëk gër kërëwa. ¹⁹ Aniyan andebën aŋ gër xodux këni hata gayik bën abi pedënd na beñëŋëanax bend këni rind beŋ, abi balënd na ado gë təkër ak end Kaxanu eŋ, end bebër dobi şëfënan fo këbi fatënd do bend gër ngwën ro fo këbi balënd. ²⁰ Biyi cëŋ, bër xwën këbo owun or gër orën hi këne. Fën ko xaniw Axwën Yesu Kërisët, afexën arebi an, mëŋ ar kënëŋo şëninde an. ²¹ Mëŋ kë nëngwët beman bendebi bend sitarak beŋ gë panga ind ko wunaxënënd gër beÿ dek iŋ ex gixën ang eman end gë enjaran endexëm ak.

4 Wën bëmaÿe bënd ke balënd do xofi ke mbaŋ bëŋ, në endewën ke nëngandëraxënënd, në endewën fo bëte këne fëbaxënënd ! Mëŋ ex, kemënayin en bayi ga sëf këno Axwën an !

Bapela bapelatar baŋ

² Axara xara këmëni Efodi, gë Seŋjetik eni wëlërënd ga hi këni ako bër Axwën. ³ Eyo, wëj ar bar ke andiyen an, wëj ar lëkayak aye andiyen aŋo an, axara xara këmi eyëbi dëca, bën mbaŋ xemëna bani ang bër

okaxër fo gë wëno gër andiyen and epëmëra ed Atëfëtan. Na fo bani bëte Këlemañ do gë bëshëxe bër xel bami andiyen aņo bën, omac odebën ok na ex gër Akayëta and aniyen.

⁴ Nëngandërayindëleņun din ga hi kën ako bër Axwën. Ga re këme bëte nëngandërayindëleņun.

⁵ Nangëralexëni bela bën dek obëngw or onden odewën ol ; gogo ko bakaw Axwën an. ⁶ Er ex yo mëkayindëno Kaxanu, end yoweỹ këren dendërand na. Nangëninđëno Kaxanu oñandi odewën ok gë cale iņ, këlayindëno do cëkwayindëno. ⁷ Ata obetak or ko yëlënd ol, obetak or nëmëcak onangëran or ex yo kë xaxa owëkw orewën oņ en bayexën bër Yesu Kërisët.

⁸ Gërëgako, bëmaỹe balëkënalindën : dek er ex đal in, dek er yapäk in, dek er šenene in, dek er wënëk in, dek er yek gër ogës od bela in do gë dek er këni šëkw in. Këñëlex dek beņo gër ojëlan odewën. ⁹ Er sëya kën do šot kën gër ndam in, er wëleli këne do wateli këne in, diyindën mondako. Ata kë bayi gër ndewën obetak or ko yëlënd Kaxanu ol.

Ecëkwa el

¹⁰ Wëno mbaņ nëngandëra ke do këmo šëkwand Axwën an ga këme watënd mëne wën abal këņun balënd gašëxe endam eņ. Enimin din këņun balënd endam eņ, amëd and ene dëcaraxën aņ fo bayik an cot bana. ¹¹ Ame yeyanënd na đe mondako gayik yey šan

këme na. Wëno enimin, asëya sëya këme enëngandëra ed and şotëra këme el bëte gë enëngandëra ed and ame cotëra ex na el. ¹² Awër wër ke ewuren ed gë ocënd el, bëte awër wër ke ewuren ed gë ecotëran el. Nand ex yo do gër ed ex yo, asëya sëya këme ewuren ed baño me med aye, baño me bayi gë enjo ; baño me cotëra, baño me can. ¹³ Beño dek këme xorënd me muña gë panga ind ke yëlënd Yesu Kërisët inj. ¹⁴ Barikan aye ri kën ga necët këne ako gër ocënd. ¹⁵ Wën Bëfilip bën aye nang kën mène and şanu këme gër Ebar ed Masedëwan aņ, me ñanaxën epëmëra ed Atëfëtan el, wën fo rëcara baxe. Amara acëxe axe dëcara bana. ¹⁶ Ado and hi bame gër angol and Tesalonik aņ dëņ, alawënelili lawënelili këne bakëlëbëd baki er këme wurexën in. ¹⁷ Wëno er këme şaland Kaxanu exo cënan bacota bandewën baņ, bari ax gena ene yëlërand bela. ¹⁸ Dek şot këme bebër yap bax me cot bën, bakey band ecotëran baņ ex. Ata gwac şotëra këme ga xana këme ako er lawëneliw këne paß gë Epafërodit in ijo. Ang angiri inëngax fo ex, şadaxa ir xana ko Kaxanu. ¹⁹ Awa Kaxanu arëcara këņun dëcarand mbaņ paß gë Yesu Kërisët en cotëraxënënd dek bebër kën wurexën bën mène ngëņ, napul ir gë enjaran in. ²⁰ Duwanëņone Faba irebi Kaxanu, mëņ ar gë enjaran end din ir din an. Amen !

Epelar el

²¹ Cëmayinëbi dek bër sana këbi Yesu Kërisët eni gi bërëxëm bën. Ašëma šëma kënun bëmaÿe bënd hi këmi enga emat bëñ. ²² Dek okërecëñ ok këñun šëmand, adofa od ex gër eyang ed Sesar ok. ²³ Oyekax or Axwën Yesu Kërisët ol, gilex gë wën !

Kayëta ir

Bëkolos Bën

Ecëmar el

1 Wëno Pol, batula ir Yesu Kërisët hi këme ang ãyandi këno Kaxanu ak. Gë abaãe Timote këmun ãyëgwënëlin² wën bëmaãe bëmënëk, bënd wãk end Yesu Kërisët gër Angol and Kolos bëñ. Faba irebi Kaxanu yëlëleñun oyekax ol do gë obetak ol !

Cale ind ecëkwa iñ

³ Ašëkwa këmo šëkwand Sëm ir Yesu and këmun šalënënd wën dek añ do nand ke šalend yo. ⁴ Enimin, awëlati wëlati këmi mëne mo kwëta xwëta këno Yesu Kërisët do bëte mbañ ãhan kënebi dek okëreceñ ok. ⁵ Mondako kën rind në end er fenin këñun Kaxanu yañ gër orën do kën yarënd eñ. Er kën yarënd ijo, elod gër ãyanar wël kën paß gë Atëfëtan and ex eyeyan ed ðal añ. ⁶ Atëfëtan año ãhatëlik gër ndewën do ang këbi nëngwëtënd bela bën gër ed ex yo gër ngwën ro xali këni ãyëmbërend bër wãk bën, mondako këñun nëngwëtënd do kën ãyëmbërend wën bëte elod yatir wël kën do nang kën enim oyekax or Kaxanu ol. ⁷ Ax gena nde Epafëras sëyalira këñun ? Mëñ ex ar ãhan këneñone an do gë wëno bar këmi andiyen amat. Ata abalëkënalind andiyen and Yesu Kërisët añ gër

ndewën fën. ⁸ Afelati felati këbo end aņana and yël këņun Angoc Amënëk eņ.

⁹ Mëņ ex, biyi bête din këmun şalenënd elod yatir wël këmi eņo. Axara këmo xarand Kaxanu en ñëm gë Angoc andexëm and kë yëlënd gë orenik ol dek, en nangaxën oņandi odexëm ok. ¹⁰ Do mondako kën wurexën ang këņo ŷapanënd Axwën ak, sam en dind din benjekax bend këņo ŷandind beỹ. Iyo axara këmo xarand eņun nengwët en dixinënd bandixa banjekax band ex yo do eno nangaxën nëmëc. ¹¹ Axara këmo xarand bête Kaxanu eņun yël panga itëm indexëm iņ mëņ kën xemënaxën gër ekwëta edexëm do en muņaxënënd gang këņun yëka yo, gë onënga fo. ¹² Awa cëkwayindëno Faba Kaxanu, mëņ ar sana këņun en gi şëf gër bër kë şot er fenin këbi bëwënëk gër angobën andexëm. ¹³ Mëņ racët këbo gër mbëña ind ecamëdan do wëla këbo gër owun or Asëñiĩw ir ex pëlot gër yomb irexëm. ¹⁴ Ga bar këne gë Asëñiĩw şotaxën këne Apexa aņ, gë eteban ed beñëņenax bendefi el.

Ola or Yesu Kërisët ol

¹⁵ Yesu Kërisët ex eñaĩ end Kaxanu eņ,
Eñaĩ end Kaxanu ir bayik anëņo watënde na eņ.
Mëņ ex Asëñiĩw ar Kaxanu ar hik damana
exo dixën beỹ dek an.

¹⁶ Paḅ gë mën̄ ri ko Kaxanu dek beỹ bën gër orën
do gër ebar,

Bebër wat wat bën do gë bebër ax gena wat wat
bën,

Dek ßangoc ßand këbi wëñand bela baᅇ,

Gë baķeỹax baᅇ do gë dek ßand baỹik baᅇ.

Dek beỹ bën ri ko Kaxanu paḅ gë Asëñiĩw do exo
kwën Asëñiĩw.

¹⁷ Mën̄ hik đamana ex gixën beỹ dek

Do mën̄ kë ßarënd do kë lëķayand dek beỹ bën.

¹⁸ Mën̄ ex gaf ir eman in mën̄e ngën̄ emun end
Amara aᅇ.

Gër ndexëm ÿanak aniyan aᅇ,

Mën̄ ex aỹanar ar xanik or din gër ecës an,

Exo gixën aỹanar gër beỹ dek.

¹⁹ Kaxanu wa ÿandi baᅇo ola orexëm ol
Dek ex gi gër Asëñiĩw.

²⁰ Do paḅ gë mën̄ ÿandi këᅇo exo baķaliw
angwëlëra and mën̄ gë beỹ dek aᅇ,

Angwëlëra and mën̄ gë bebër ex gër ebar aᅇ

Do angwëlëra gë bebër ex gër orën aᅇ paḅ gë
oşat or Asëñiĩw or şarëķ gër ķërëwa oᅇ.

²¹ Wën̄ cëᅇ, akarëķ aᅇ anëķa hi ban ßëliyer do

ßërangoyëra and gë Kaxanu paḅ gë ßanjëlan

ßañëᅇnax baᅇ do gë ßandixa ßañëᅇnax ßandewën

baᅇ. ²² Barikan gërëgako angwëlëra and wën̄ gë

Kaxanu aŋ bakawëk paß ecës ed Asëñiŵ el, en gixën bëwënëk, bëyekax do bër gë end kënëbi nëp këm gër ogës odexëm. ²³ Mondako kë hi angëmëne abayi bayi kën ga lëg kën gër ekwëta edexëm, cenarëxe do tebëre eyar ed er kë yëlënd Atëfëtan el. Atëfëtan aŋo wël kën, afem femënd këni gër ed yo gër ebar ro. Wëno Pol, Kaxanu fana ke me pemërand.

Andiyen and Pol aŋ

²⁴ Anëngandëra ke nëngandërand gërëgako ga këme sorond në endewën na. Me ŋata mondako toro ind soro ko Yesu Kërisët në end Amara andexëm. ²⁵ Wëno ariyenin ar Amara hi këme. Kaxanu fana ke në endewën na me nangëna xën dek eyeyan edexëm el. ²⁶ End er şon babi Kaxanu akarëk bela bën ang bëtëraraw këni bandëwëra ak këme rend. Gërëgako wa wăsin këbi bëwënëk bërexëm bën. ²⁷ Wën bër ax gena Bëşëwif bën yandi baŋo Kaxanu eŋun masin ekëbëna xik end şon baxo eŋ mënë ngëŋ : Yesu Kërisët exo dëg gër ola orewën, en cotaxën enjaran end kën yarënd eŋ. ²⁸ End Kërisët ijo eŋ këmi femërand eni wëlëraxën dek bela bën. Anangën këmëni nangëniënd do asëyalı këmëni sëyalınd gë orenik orebi ol dek eni ŋatëna xën o wënëk ol and këni bar gë Yesu Kërisët aŋ. ²⁹ Wëno në eŋo këme xemëna xënënd gër andiyen gë panga ind ke yëlënd Yesu Kërisët do kë riyenind gër ola oram iŋ.

2 Aỹandi ỹandi ke, enimin en nang okaxër otëm ond këme xaxërënd në endewën oņ, në end okëreceņ od gër Lawodise do në end dek bër bayik elod ax wate na dëxas iram ok. ² Er këme şaland en kapina, en bar, en dëkër mbaņ do eņun cëdëtara aye gër onden ondegwën en nangaxën ola or Yesu Kërisët or şon baxo Kaxanu ol. ³ Yesu Kërisët wëxëtak gër ndexëm dek orenik ol do gë onangëran ol. ⁴ Eņo këmun nangënënd mëņ bayik ala aņun yifa na gë eyeyan enëngax. ⁵ Ado bayik ane watënd na, axetëna xetëna këmun gë onden ondam oņ do awat këme watënd gë onënga fo ang kën wëlërënd şenene ak do ang xem kën gër ekwëta ed xwëta këno Yesu Kërisët ak.

Ola or Yesu Kërisët ol gër bela

⁶ Gërëgako ga wã kën ako end Axwën Yesu Kërisët eņ, wureyindën şenene ga bar kën ako gë mëņ. ⁷ Kaxanu rëd këņun gër ndexëm ang atëx and gë odëmbët otiwax fo do në ebay eņun ang amey and aciw fo. Awa kemënayin gër ekwëta ang sëyali kënun ak do cëkwayindëno mbaņ. ⁸ Titinayin këdi këņun lëkaya ala gë orenik orexëm ol xarak gër orenik olo ofëcak ax gena, nįifa fo ex, bend rëpën këni bela fo ex, bend gër ngwën ro fo, ax gena bend Yesu Kërisët. ⁹ Ata dek ola or Kaxanu ol gër Yesu Kërisët ex xali gër eman endexëm. ¹⁰ Do wën ga

bar kën gë mën̄j šotëraxën kën dek beÿ bën. Mën̄j wa wëña këbi dek dek bangoc band këbi wëñand bela baŋ do gë bakeyax baŋ do gë dek band bayik baŋ.

¹¹ Ga bar kën gë Yesu Kërisët xacaxën kënun bëte oxac or ko xacënd ol, ax gena or ri këni bela. Er wacayak mëne anëka rëxët ko oñand od eman od baŋun lënanënd eñëjënax ok. ¹² Do xobuyi or buyi kënun ol watinalik mëne wën anëka šës kën do wëg kënun gë Yesu Kërisët. Bëte anëka xani kën gër ecës andamat gë mën̄j, ga wã kën mëne Kaxanu axanin xanin këjo gër ecës gë panga indexëm iŋ. ¹³ Wën anëka nemi ban në end bamena bandewën gayik axo dëxët bana pere oñand oñëjënax odewën ok. Barikan gërëgako axanin xanin këjun gër ecës andamat gë Yesu Kërisët. Aseban seban këbo dek bamena bandëbi baŋ. ¹⁴ Yesu Kërisët, and nemi ko gër kërëwa, afëxwëc fëxwëc ko dek oñëgw od bafo lëxwënd ok paß gë bapela band Kaxanu baŋ, ax box na ga këbo šëndën.

¹⁵ Mondako šudëtëra këbi owun ol dek bangoc band këbi wëñand bela baŋ do gë dek bakeyax baŋ. And šës ko Yesu gër kërëwa aŋ, poyoma fëlët këbi enëbi watëra bela dek gër enga end bër xor këbi.

¹⁶ Mën̄j ex elod yatijo, ax ñape na eŋun nëpënd ala në end er kën yambënd, në end er kën šëbënd, në end ofëna, në end epëb ed akey and kë fënund fancaw̄ do gë akey and eteyëta. ¹⁷ Bejo dek eñaw̄ end Yesu Kërisët bax yowënd fo bax damana exo ŋatëgu. ¹⁸ Bër

kë rend mo toroli ex eman bën, mo cale exëni omeleka ok, kërenëbi tebënd na enun nëp. Bëjo ašëkwër këni šëkwëndërend në end odakeli odebën, afufënara këni fufënarand në end banjëlan bandebën xarak band bela fo ex, ofëcak ax gena. ¹⁹ Eman ex dafaxën, gaf in gë owal ok kë bayind ga šosarëk gë bangën baŋ do gë ocom ok. Bari bela bëjo ani dafënd na gayik ani box na ga šosa këno Yesu Kërisët.

Aniyan and gë Yesu Kërisët aŋ

²⁰ Angëmëne ašës šës kën gë Yesu Kërisët anëka šapër kën gë bend gër ngwën ro beŋ. Inecëŋ kën bakaxënënd gër mbëña ind bacariya band gër ngwën ro, nangëde abayi bayik ga wëña këŋun beŋo ?

²¹ Inecëŋ kën wëxënënd enun kënun felënd : ax gena mo međ, ax gena mo tÿyí, ax gena mo nek... ? ²² Beŋo đek ado ga šëbak doro, ayep kë yep ecan ; bapela do gë osëyali or bela fo ex. ²³ Dal ex mëne beŋo nangëde orenik fo ex ga kë rend mo pëb ex bapela band cale baŋ, mo manaya ex do mo toroli ex eman eŋ. Beŋo bend këŋo nënganënd eman fo ex, ofëcak ax gena.

3 Awa angëmëne axani xani kën gër ecës gë Yesu Kërisët, calayindën bend yaŋ gër oren beŋ, bend gër ed yëpa ko Yesu Kërisët gand liw ir Kaxanu beŋ. ² Balindëleŋun bend er hik yan gër orën beŋ, këreŋun balënd na bend gër ebar ro beŋ. ³ Wën anëka

şës kën do aniyân andewën aņ anëka şon ko Kaxanu gër Yesu Kërisët. ⁴ Enimin, Yesu Kërisët ex aniyân andewën aņ do and ko şanayaw aņ wën bête aşanaya kën şanaya gë mëņ gër enjaran endexëm.

Ola oxarëk ol paß gë oxaşax ol

⁵ Awa daşwin er wërëk gër ebar ro in : asëk alakirand fo in, obuyaraxik ol, eņan ed becëfëanaxik el, oņandi oņëņëanax ok do ar aņana and kodî and ex andamat gë ekëla ed olaş aņ. ⁶ Në end bamena baņo këbi xitixën Kaxanu bela bër këņo wëşenënd bën. ⁷ Ata wën gër bamena baņo yëlaya ban de akarëk aņ, and ban wurend mondako aņ. ⁸ Barikan gërëgako, dapin caw dek beņo : oxoỹ ol, owër ol, emer el, odena ok. Ado becëfëanaxik beņ kërex canënënd na gër etëỹ edewën. ⁹ Ax gëna mo nëgwëşandër. Wën anëka şudëta kën ola oxarëk ol do gë bebër wër baņun akarëk bën. ¹⁰ Anëka şuda kën ola oxaşax ol, anëka hi kën bela bëxaşax, eno nangaxën Kaxanu mëņ ar wëndër kën do ri këņun an. ¹¹ Epitëndër ax box na. Ajo Aşëwif ex do ajo axo gena Aşëwif ax box na. Ajo axac xac ex, ax box na. Ajo abapuỹ ex, ax box na. Ajo xadëp ex, ax box na. Barikan anëka hi kën wën dek ar abat : Yesu Kërisët ex dek do gër wën dek.

¹² Awa gayikako Kaxanu sana këņun en gi bëwënëk do bër pëlot gër yomb irexëm, canayayindëlex gër ola orewën : axaỹënan in, oyekax ol, ebanan

el, onëngax ol, ebuñan el. ¹³ Buñarindën andewën rewën do tebandëringdën. Angëmëne ala eño menan așandañ, tebanëleño ang këñun sebanënd Axwën Yesu ak wën bëte. ¹⁴ Er ãapëk en balëkënalind nëmëc in ex, eñun balëringd. Ebalër el këñun bar en gixën enimin bëwënek. ¹⁵ Obetak or Yesu Kërisët or waceli këñun Kaxanu en gixën eman emat ol, këñël ex gër oñëkw orewën. Cëkwayindëno din Kaxanu ! ¹⁶ Eyeyan ed Yesu Kërisët el, gë oxëbën orexëm ol dek, nëmël ex gër oñëkw orewën. Tëyalirindën do pelëringdën gë dek orenik ol pañ gë ocalemonëñ ok, ojëkan od cale ok, gë od këno yasaxëningde Kaxanu ok, od këñun yëlënd Angoc Amënek ok. Yasindino gë emëkw el dek në end oyekax or rin këñun. ¹⁷ Er kën rind yo, hik eyeyan, hik andiyen, diyindën në end oñac or Axwën Yesu. Cëkwayindëno Faba Kaxanu pañ gë mëñ.

End ekun eñ

¹⁸ Wën bësoxari bën, baxëtindën end bëcën bëndewën eñ, ang ãapëk eni dind bër bar gë Axwën añ. ¹⁹ Wëj asoșan an, ñanëlo alindax do këreyëño masinënd na owër.

²⁰ Wën obaș ol, baxëtindën gër beñ dek end bëxarëk bërewën eñ gayik eño këño nënganënd Axwën an. ²¹ Wën opaba ok, kërenëbi cëndëningd na obaș orewën ol këdi këbi șena.

End okadëp do gë bëxwën eņ

²² Wën okadëp ok, baxëtindën dek er kënun felënd bër xwënëk beman bendewën in. Baxëtindën xarak ax gena nand kënun watënd fo nangëde bela fo kënëbi riyeninënd. Baxëtindën gë emëkw epeşax, yedayindëno Axwën an. ²³ Er kën rind yo, diyindën gë emëkw el dek. Axwën an këno rinënd, ax gena bela. ²⁴ Nangin mëne ayël këņun yël acosa and fenin këņun aņ. Enimin, Yesu Kërisët ex Axwën arewën an. ²⁵ Awa ar kë rind betëmbak an, acosa and betëmbak aņ ko xana : eyakan ed ala ax gi na.

4 Awa wën bëxwën bën, dinindënëbi gwër fo bend şenene beņ okadëp odewën ok. Nangin mëne wën bëte gë Axwën hi kën yaņ gër orën.

Bapela bapelatar baņ do gë epelar el

² Wën dek kemënayin gër cale key yo key, perënayin do cëkwayindëno Kaxanu. ³ Calenindënëbo biyi bëte, Kaxanu ebo yël amëd and mi pemaxënënd eyeyan el do mi deyaxënënd end şonayak gër Yesu Kërisët eņ. Në eņo fëraxën këne wëno. ⁴ Calenindëne wëno mëņ këme yāna me yeyanënd end şonayak eņo ang yāpëk me yeyanënd ak.

⁵ Wureyindën gë onden oņ mërëxand ir bër ax gena okëreceņ. Nand kën şot amëd and en di enjekax na, diyin enjekax eņo. ⁶ Eyeyan edewën el giyindëlex din

enëngax, ed lamb këni gë ongal. Nangindën ang ÿapëk eno yakand ala kala ak.

⁷ Awa Tişik dek këjun felërax endam eñ. Mëñ, imaÿe ind kë balëkënalind andiyen hi ko do wëno mbañ ke balënd endexëm eñ ga bar këmi oxadëp ol gër Axwën.

⁸ Anëka këmo lawënëlinde mama dëñ en nangaxën ang hi këmi ro ak mëñ këjun yëmaxën owëkw oñ. ⁹ Gë Onesim, imaÿe ind mo kwëta ind ke balënd mbañ in, këmëni lawënëlinde. Ado mëñ arewën ex. Bën tak këjun nangëndërax dek bend kë xwucand ro beñ.

¹⁰ Awa Arisëtarëk, andepëra acandawën añ këjun sëmand. A sëma kënun sëmand bëte Marëk, imaÿe ind Barë nabas in. Endexëm eñ fel këmun mëne and ko ñhatëli gër ndewën añ, mëlayayidëno aye. ¹¹ Bëte Yesu, ar nëngwët këno Yustus an, a sëma këjun sëmand. Gër Bë sëwif, bën bësas bëjo fo ex bër ke rëcarand gër andiyen and enangën ed bela owun or Kaxanu el. Bën mbañ xemën këne wëno. ¹² Epafëras arewën an, a sëma këjun sëmand, xadëp ir Yesu Kërisët hi ko. Ata mo këmëna xemëna ko ecalen edewën el en gixën bëwënëk, eñun pënexënënd sënene dek er ÿandi këjo Kaxanu in do en bayexën gër fëña ir sëf kë. ¹³ Wëno sede hi këme mëne mbañ ko sëwënd në endewën na, në end okëreceñ od gër Lawodise na do në end od gër Hiyerapolis na. ¹⁴ Demas, gë Lik axora ar ke balënd mbañ an, a sëma kënun sëmand bëte.

¹⁵ Cëmayinëbi bëmaÿe bënd gër Lawodise bëñ. Cëmayino Niñëfa do gë bër gër Amara and hik gër iciw̃ indexëm bën. ¹⁶ And kën fën kayëta ijo na gër ndewën añ, diyidën dek er kën xor in eni pëanaxën bëte bër gër Amara and gër Lawodise bën. Wën bëte pëniyidën kayëta iram ir kë xaniw gër Lawodise in. ¹⁷ Pelino Arësip exo mëlaya do exo dind aye andiyen and xwëtënan këño Axwën añ, mëñ ko ãhataxën êenene.

¹⁸ Ata wëno Pol dëñ këñun êëmalind do këme ÿëgwënd gë andam. Kwitayindën mëne wëno gër epëra ro hi këme. Awa yëlëleñun Kaxanu oyekax ol !

Kayëta ir

Filemon

Ecëmar el

Wëno Pol, ar fëra këno në end Yesu Kërisët an, wëno gë abaÿe Timote ki ÿëgwënëlınd wëj Filemon. Wëno mbaŋ ke balënd endey eŋ, wëj ar hi këne andiyen amat an. ² Gër kayëta ijo ro, abar bar këmun wëj gë Apiya, imaÿe itoxari indefi iŋ, gë Arëſip ar xel këmi endemat an do gë bër gër Amara and hik gër iciw̃ indeÿ bën. ³ Faba irebi Kaxanu do gë Axwën Yesu Kërisët, yëleleŋun oyekax ol do gë obetak ol.

Aŋana aŋ do gë ekwëta ed Filemon el

⁴ Din këmi xwitand mi calen do këmo ſëkwand Kaxanu ir xwën ke. ⁵ Awëlati wëlati këme mëne wëj mbaŋ xwëta këyo Axwën Yesu bëte mbaŋ ki balënd end dek okëreceŋ ocandax eŋ. ⁶ Ga bar këne ako ekwëta ebat, anang nang këy dek er yek eyëbo din në end Yesu Kërisët in. Awa masinëlëbo ngwa. ⁷ Wëno mbaŋ nëngandëra ke do mbaŋ xemën ke aŋana andey aŋ. Abaÿe Filemon, enimin okëreceŋ od anjëm yema këbi owëkw oŋ në endey na.

Emëka ed Pol el

⁸ Mëŋ ex, ga yël ke Yesu Kërisët or gapak ol, anëÿali anëÿali domi er ÿapëk ey di in, bari ame di na. ⁹ Er

ÿapan ke mi kara mo kara ga nang këme ako gë añana hi këy. Wëno Pol, anëka xar këme bëte waca ke hi këme gër epëra në end Yesu Kërisët. ¹⁰ Axara këmi xarand end Onesim eñ. Asëñiwën iram hi ko elod yatir wã ko end Yesu Kërisët eñ ro gër epëra. ¹¹ Bakey band xucak bañ, ofëcak abaxi rin na. Barikan gërëgako, këbo rin na wëj gë wëno. ¹² Anëka felëli këmo exo maỹili ado ga lëkar këmi mbañ. ¹³ Dek ÿandi baxe exo bayi gër ndam ro, exe dëcarand ang do ye rëcara wëj ak ang hi këme gër epëra në end Atëfëtan ak. ¹⁴ Bari gematak axe ñandi bana me di xarak axe wëlërexe na pere këdi këmi nëỹali eye din oyekax olo.

¹⁵ Bamat imëd fo şapër ban gë Onesim en xetaxën din. ¹⁶ Barikan gërëgako nëmëc xadëp hi ko. Imaỹe ind ki bal mbañ hi ko, axo box na xadëp fo. Wëno gë pit ke balënd endexëm eñ xarak wëj doxi balënd nëmëc gayik xadëp irey ex. Bëte arey hi ko ga bar kën ako gër Axwën Yesu. ¹⁷ Awa angëmëne wëno lawo irey hi këme, kwëtayalo Onesim ang xwëtayadoye wëno ak. ¹⁸ Angëmëne añenan wënan ki, wëno këye wëkad do angëmëne ÿeỹ bayir kën na, wëno ki wãşënëd. ¹⁹ Ata wëno Pol kë ÿëgwëлинд gë ataxan andam añ dëñ : wëno añwãşën këmi wãşën. Wëj aniyan andey añ dëñ ga ÿomëxa këye wa, bari ami pel na. ²⁰ Eyo abaỹe, dëcale mondako në end Axwën Yesu

Kërisët, yemënël emëkw edam el ga bar ke ako gër ndexëm.

²¹ Anang nang këme mëne aũa këy ãa er këmi ãëgwënëlinde gër kayëta ijo ro in. Aye fëni ke mëne nëmëc er xara këmi in këy ri. ²² Gërëgako këñënanëxëye bëte aciũ, yëla këme mëne asebët këne sëbëtëli gayik Kaxanu ayakali këñun yakali cale indewën iñ.

Epelar el

²³ Epafëras, imaỹe ind fëra kënebo në er ebat në end Yesu Kërisët iñ, așëma këñun șëmand. ²⁴ Așëma kënun șëmand bëte bër andiyen amat gë wëno bën : Marëk, gë Arisëtarëk, gë Demas do gë Lik. ²⁵ Yëlëleñun Axwën Yesu Kërisët oyekax orexëm ol !